

李文忠公全集

奏稿

Vertical text in a narrow column on the left side of the page, possibly a title or index.

李文忠公奏稿

卷之十八目錄

改派赴庫統領摺

同治十年正月十二日

體卹盧商摺

同治十年正月二十四日

籌議口外辦運庫科駐兵摺

同治十年二月初六日

調應寶時赴津議約摺

同治十年二月二十五日

口外兵米擬辦商運摺

同治十年三月二十六日

籌議口外調兵運糧緩急摺

同治十年四月二十三日

查閱大沽礮臺片

同治十年四月二十三日

盛軍欠餉廣額片

同治十年四月二十九日

覆陳湘淮營制雜支定章片

同治十年五月初六日

張家口糧臺請撥部餉摺

同治十年五月初十日

請簡全權大臣議約摺 同治十年五月二十日

附日員照會

續派防庫練軍暫緩起程摺 同治十年五月二十九日

蘆鹽礙難加價摺 同治十年六月初一日

日本使臣到津片 同治十年六月初九日

海防支應局報銷摺 同治十年六月十二日

請飭迎提防庫糧石摺 同治十年六月十五日

日本議約情形摺 同治十年七月初六日

附來往公函

日本約章繕呈底稿摺 同治十年七月十五日

日本議約完竣摺 同治十年七月二十九日

請嚴禁邊糴摺 同治十年八月二十一日

截留京餉尾數片 同治十年九月初七日

教案內俄案片結摺 同治十年九月初九日

古北口練軍出口摺

同治十年九月十五日

籌撥烏城皮衣銀兩摺

同治十年九月十五日

大沽海口酌定營制章程摺

同治十年十月十一日
附清單

凌煥集錄通商成案片

同治十年十月十一日

覆奏封河回省摺

同治十年十月十七日

外省捐賑請獎片

同治十年十月十七日

南運河經費不敷摺

同治十年十月十九日

南運河工請免賠修片

同治十年十月十九日

李卿穀父子請列祀典片

同治十年十月二十六日

籌議口外轉運摺

同治十年十一月十二日

胡光墉等捐賑請獎片

同治十年十一月十二日

采購閩米濟賑摺

同治十年十一月二十日

重修

畿輔通志摺

同治十年十二月十七日

修治府河摺

同治十年十二月十九日

李文忠公奏稿卷十八

全集一之十八

桐城吳汝綸編錄

改派赴庫統領摺

同治十年正月十二日

奏為宣化巡防緊要擬留該鎮總兵王可陞督率整頓其調赴庫倫官兵請

旨飭令游擊徐平川統帶前往俾征防兩無貽誤恭摺仰祈

聖鑒事竊查上年十月內賊匪竄陷烏城疊奉

寄諭調派宣化鎮官兵一千名前赴庫倫防剿經臣於該鎮練軍內挑派馬隊營官兵二百名步隊兩營官兵各四百名籌撥餉需給發棚帳遵

旨轉飭總兵王可陞統帶前往並揀派宣化左營游擊徐平川護理總兵篆務先後奏蒙

聖鑒在案嗣准察哈爾都統臣文盛咨稱口外蒙古臺站艱苦薪
水缺乏駝隻蒙包措備未齊應俟察哈爾吉林黑龍江各起馬隊
出口後再行接續前進現查察城馬隊甫經分起出口吉林黑龍
江官兵尙須置辦鍋帳始克成行而達爾濟所帶頭起馬隊因推
河以北哈爾呢敦等處臺站尙未設復仍在賽爾烏蘇一帶屯紮
復准文盛咨稱欽奉上年十二月二十四日

上諭烏城退出賊匪尙盤踞金山卡倫察罕博克多地方據逃回
蒙民聲稱仍欲回竄飭達爾濟一軍設法西行等因欽此是宣鎮
奉調官軍自應仍飭銜尾進發惟查宣化鎮統轄獨石口張家口
二協宣化城守等二十餘營內以拱衛

京師外以控馭北邊爲關外第一重鎮所屬張家口等城商民雜
處游匪出沒彈壓巡防在在均關緊要非威望素著之員不足以

資統率該總兵王可陞到任兩年於操練各事認真整頓其威信
爲各營將弁所服若令帶兵遠出一時接替之人殊非居重馭輕
之道且目前金積各堡先後收復河西王曠堅寨經金順張曜兩
軍攻克甯靈腹地一律肅清臣接據前敵探報陝回崔三禹得彥
等乞撫河州踞逆亦有投誠之意是隴甘軍事大有起色盤踞金
山賊匪或可聞風解散不致乘隙肆竄烏庫情形較鬆各軍到防
後祇須擇要布紮隨時搜捕設法綏輯蒙民不令潛行勾結自可
弭患未萌王可陞籍隸湖南從前轉戰江皖疊著勞績籌防內地
尙爲相宜塞外風土非所素習該軍旣赴庫倫必非旦夕可以撤
回宣鎮地處要衝現在神機營派駐張家口各隊奉調回京察哈
爾馬隊又多遠出須有實缺知兵大員坐鎮後路以備策應似王
可陞不宜遽離宣化其派赴庫倫練兵應另行遴員統帶前往臣

查副將銜宣化左營游擊徐平川由直隸行伍出身出師皖豫等省屢著戰功前由王可陞稟保護理總兵篆務經臣奏奉諭旨飭令隨時察看臣復檄調徐平川來津詳加詢察該員年力正壯樸實耐勞論其資望固未便久護鎮篆而生長北方熟悉邊塞情形水土服食較爲習慣戰守機宜亦均諳練若令帶兵赴庫協防可期勝任相應仰懇

天恩俯念宣化巡防緊要准令王可陞留鎮督率該鎮奉調馬步官兵一千名卽飭徐平川統帶俟各起馬隊全數出口催令分起馳赴庫倫一轉移閒征防均可得力而人地尤爲相宜臣愚慮所及是否有當理合恭摺由驛馳陳伏乞

皇太后

皇上聖鑒訓示遵行謹

奏

體卹蘆商摺

同治十年正月二十四日

奏爲蘆商疲累過甚援案酌減額引並請將軍需復價河南加價歸補積欠等項分別減免以示體卹而顧課運恭摺仰祈

聖鑒事竊查前督臣曾國藩議覆給事中陳鴻翊條奏長蘆鹽務事宜並擬減輕成本各摺經戶部一併議覆於同治八年十二月二十五日具奏奉

旨依議欽此行飭遵照辦理在案旋據長蘆眾商瀝陳苦累情形懇請再予減免由前督臣行司核議臣蒞任後復據該商等以連年銷售疲滯引地參懸應交課款無從措辦力求分別停減以蘇積困等情聯名具稟到臣經臣檄飭運司恒慶併案酌議據該司查照戶部議覆章程及商人所稟各節逐細妥議其有礙課帑者均嚴切駁斥其累商太甚而於帑項並無實濟者尙不妨酌量准

行分條詳請核辦前來臣查長蘆鹽務頹廢已久軍興以後河道淤阻苦無巨款可以挑濬各商改道改廠網運成本日重參懸引地愈多而直豫征防餉需復價加價以次漸增從前各商虧欠之項仍復責令按引歸補以致虧累日甚難期起色臣駐津半年詳加訪察該商疲累已深實有積重難返之勢欲期整頓鹽綱俾課款不致虛懸似宜體卹商艱庶完納可期有著謹參酌情形援案擬請分別減免四條具陳如左

一外商額引請援照酌減也查長蘆額引九十六萬六千餘道自道光元年以後疊奉停減現應銷京引五萬二千四十一道外引六十一萬二千二百五十六道就近年行銷京外各引實數核計同治七年共出庫引五十八萬四千五百餘道八年共出庫引五十萬七百餘道九年共出庫引五十三萬四千三百餘道銷售本

不足額包課因而虧延雖經分限勒追總未依限完納據該商等稟懇查照上年奏減京引成案一律酌減外引二成以蘇商困臣查鹽課爲帑項大宗原未便遽議停減惟近來商情艱窘較前不啻倍蓰蓋由銀價日貴腳費日增年累一年無從彌補其實銷之引與包額之課相懸過甚力難完納勢必致於參懸誠如前次部議與其責包額之虛名交課仍多短絀何如收疏銷之實效補苴得以及時且京引旣經准減外商事同一律似宜量議停減俾昭平允但統減二成與京引無所區別而課入因之短少亦非慎重出納之道擬請援照歷屆成案將現銷外引暫行停減一成六萬一千二百二十六道其減贖外引合之京引尙有六十萬一千二百餘道就近年實銷引數計之仍有盈無絀商情稍資調劑課項當倍踴躍仍俟五年後察看銷數稍旺再行請復舊額

一軍需復價請仍准暫減也查原定復價每外引銀五錢京引銀二錢五分分別隨引按限交納前督臣曾國藩於議減成本案內奏請外引減銀一錢四分京引減銀七分嗣准戶部議駁復價一項實居直省防費大宗餉源所在未便輕議更張行令仍照舊章辦理臣查復價撥款保定練餉歲需銀十三萬二千兩津郡支應局歲約需銀十萬兩其額撥銀二十三萬餘兩均不容稍有短絀若照原奏之數分別減交誠恐不敷支放餉需所係自應通盤籌畫總計近年實收復價銀數同治七年分尙收銀二十七萬兩有奇節年帶欠有減無增至九年分僅收銀二十一萬兩有奇雖經按限嚴催而完解不前積欠已鉅竭蹶情狀亦可概見若不設法量予裁減徒有追呼之煩而無收解之實該商等轉得以滯銷賠累藉口拖延仍於練餉防費無濟臣詳加酌度所減復價須與支

應月餉兩相權衡俾出入無甚懸遠擬請外引暫減銀一錢京引暫減銀五分減贖銀數責令照章隨引按限交納如有絲毫拖欠立予嚴懲其從前欠繳復價銀兩並勒限催令帶交不准藉延觀望按照此次議減之數以歲銷京外引五十餘萬道計之約可收銀十九萬餘兩再以催繳欠款通融併計目前月餉可資周轉仍俟數年之後欠項繳清察看情形如軍餉過絀或另有緩急之需再行酌量議辦

一河南加價請仍行停免也豫省前因籌辦防餉奏明蘆鹽按斤加價嗣改爲每年捐銀八萬兩由南引各商分限交納旋因該省軍務肅清復將此項改爲彌補榮工經費前督臣曾國藩於議減成本案內奏懇停免實係權宜緩急萬不得已之計經戶部議覆以此項加價已爲撥補榮工專款非豫省所能留用所請停免抽

收應毋庸議等因臣查近因河道淺阻該商等告領南引多由陸路運往沿途起剝七易舟車腳費增鉅又豫省兼食淮潞東蘆四省之鹽三路鹽價未加而蘆鹽獨加小民販賤棄貴引地半爲侵灌銷路愈形壅滯雖此項加價部議令在蘆鹽落廠所處抽收不得先由商墊無如鹽包到岸加價業已抽收而鹽仍滯銷加價無從扣回此則不令商墊而仍由商墊之實情蘆鹽引岸豫省最廣而疲累已最甚是以請運南引年減一年上年河南僅領引十四萬五千餘道較之七八兩年愈形短絀此其明證伏查前項加價原以彌補工需今南商所存無幾皆岌岌自危朝不保暮若必責令完交虧賠日甚必致參革而參懸之岸商人視爲畏途孰敢接認不特榮工籌補難期實濟且於通綱引課大有關礙擬請將此項加價銀兩仍准全行停免俾商本稍輕引岸或可漸復

一補欠積欠請仍予暫停也查道光二十八年釐定科則第三款補欠銀八分七釐有奇第四款歸補積欠銀一錢六分一釐有奇由各商按引攤交彌補前商舊欠前督臣曾國藩於議減成本案內奏請暫停經戶部議覆令仍按外引隨引先交銀一錢二分京引隨引先交銀八分其餘分限完交之銀准予暫停五年等因臣查蘆商疲乏日久應交正雜課項依限措繳尙覺喫力此項舊欠自定章以後歷年均未清完同治二年改爲外引先交銀一錢二分京引八分因商力未逮五年復減爲外引先交銀一錢京引先交銀六分而徵收猶形掣肘部議僅就二年減交之數爲定實則五年續交之數亦難照辦緣近年銀價增昂河道淺阻又疊次被災加捐未能一律補運各商情形苦累無力再代前商補交欠款委由時勢使然與道光年間定章之時迥相懸殊況此項銀兩非

關鉅款要需卽遇有傳辦要件亦非長蘆年例尙可於引課項下
通融湊撥所有補欠積欠二款隨引先交銀數擬請仍照原奏准
予暫行停交俟五六年後商力稍紓再飭照舊捐解以資彌補
以上四條均就目前情形逐加體察總求有益於運商而又無甚
礙於庫款卹商卽所以保課一節動關乎全綱臣職司鹺政不敢
膜視其頽敝而不爲挽救再四斟酌變通以求有濟仰候
聖裁除上年戶部議覆曾國藩奏陳蘆鹽條款內有應行查覆之
件由臣飭司確查詳覆另行咨部查照外所有議請暫停額引及
酌減復價停免加價補欠各緣由理合恭摺具陳伏乞

皇太后

皇上聖鑒敕部核覆施行謹

奏

籌議口外辦運庫科駐兵摺 同治十年二月初六日

奏爲口外霍呢齊地方已由察哈爾派員辦理接運毋庸另派以免紛歧並酌議庫科兩處擬令宣大官兵各駐一城俾有專責恭摺仰祈

聖鑒事竊臣欽奉正月十七日

上諭奎昌文碩奏請飭撥官兵赴科防守一摺著張廷岳阿爾塔什達於前調宣化大同兩鎮官兵二千名到庫後卽各撥五百名配齊軍器派員管帶前赴科布多駐紮以資防守等因欽此又奉

正月二十七日

上諭福濟等片稱請飭口北道隨帶委員並張家口現存烏城餉項迅到霍呢齊辦理接運酌撥貢果爾馬隊護守糧臺等語著李鴻章卽飭口北道前往辦理如該道未能分身卽由李鴻章何璟

各派得力道府迅卽出口接辦等因欽此仰見

眷念邊防軫懷兵食

聖謨廣運欽悚莫名惟查此次奉調各起征兵赴烏庫協防該城均非產米之區大軍雲集枵腹堪虞是以遵

旨飭委口北道奎斌在張家口設立糧臺采辦米石源源運濟責任至重斷無可以分身之理至口外臺站皆係蒙古地面官軍經過需用蒙古包及駝隻廩羊等項須向游牧各旗設法勸辦內地文員派往蒙地情形不熟言語不通動形掣肘必誤事機去冬福濟奏請由直晉派員出口設立糧臺奉

旨令臣等會商辦理臣當以頭臺至賽爾烏蘇一帶業經察哈爾都統添設轉運可毋庸另議設臺分咨查照在案文盛上年陳奏亦聲明口內采辦征兵口糧責成口北道專司其事口外應設分

局由文盛派員經管自係體察情形因地制宜之策頃准文盛咨送正月二十一日覆陳妥籌征兵出口事宜摺內擬於頭臺六臺十二臺各另派官一員兵十名自十八臺起至四十四臺擬將參領貢果爾所帶官兵分段撥駐遞送糧餉卽令貢果爾在十八臺駐紮總司催趲是口外各臺籌辦接運已極周密且霍呢齊係二十五臺尙是察哈爾所轄卽在文盛籌辦接運之內福濟前奏自係未悉情形此事必須畫一不可再議更張至推河以北赴烏赴庫臺踏疊奉

嚴旨催飭各該將軍大臣就近設復亦係分內應辦之事無所用其推諉此時各軍糧食爲最要旣由張家口糧臺采辦沿途各臺祇須接遞轉運應責成貢果爾一手經理似未便另由內地派員往辦徒涉紛歧而於挽運仍無實濟據口北道奎斌稟覆該臺采

買裝運各事極繁若再赴口外設臺於無糧無人呼應不靈之地是去有事之所於不顧轉駐無事之地而觀望亦覺無此辦法此口外霍呢齊業經辦理接運毋庸另行派員之實情也又宣大官兵各撥五百名分赴庫科兩城駐紮防守一節查庫倫在張家口之北四十六臺科布多又在庫西三十二臺兩城相距數千里茲奎昌等奏令宣大兵各分兩處不特兩鎮統帶之員兼顧爲難卽運糧轉餉由後路分解兩城必多驛轆歧誤凡軍營調隊宜整不宜散宣大遠戍之卒各僅一千本甚單薄聚紮尙可得力分散恐皆無用且用兵必取地勢之相宜科城在西該城商賈向在歸化城采辦食物一切晉省現又在歸化設立轉運糧局若以大同兵一千名駐守科城弁兵接濟易通卽家信銀兩亦便寄帶是科城與大同官兵相宜也庫倫在北該處商民向在張家口采辦食物

一切直省現又在口設立糧臺若以宣化兵一千名駐守庫倫弁兵接濟易通卽家信銀兩亦便寄帶是庫倫與宣化官兵相宜也與其分撥兩處致軍情多有不便不如各駐一城俾防務得有專責可否請

旨敕下庫倫科布多大臣俟宣大官兵到庫後卽留宣兵駐庫而調大同兵全隊赴科人數並無增減庶兩鎮統帶各易鈐束兩省解運較易專籌勿再零星分撥轉於防務無裨此宣化大同官兵各撥五百分赴庫科微有窒礙之實情也口外用兵籌糧籌運均極艱難必求人地相宜乃克有濟各將軍大臣等倉猝集議或未暇一一深謀惟於實在事理隔膜之處臣既有所見不敢不據實瀝陳理合恭摺馳奏是否有當伏乞

皇太后

皇上聖鑒訓示謹

奏

調應實時赴津議約摺
同治十年二月二十五日

奏為日本議約關係緊要遵

旨豫行區畫請調熟悉洋務大員來津商辦恭摺具陳仰祈

聖鑒事竊臣承准軍機大臣字寄正月十九日奉

上諭曾國藩奏遵籌日本通商事宜所陳派員駐紮日本約束內

地商民一節與李鴻章前奏大意相同至謂明定章程不外體制

與稅務兩端仿照泰西之例固無不可但條約中不可載明比照

泰西各國總例辦理及後有恩渥利益施於各國者一體均霑之

詞以免含混等語所慮頗為周密著李鴻章按照曾國藩籌議各

情豫行區畫庶將來該國使臣到後得以因時制宜不致再蹈從

前隔閡覆轍是為至要等因欽此仰見

聖慮周詳無遠弗屆欽佩莫名查日本通商事宜臣於上年十二

月間遵

旨預籌附陳大略並聲明俟該國使臣前來再與承辦議約之員
 相機妥議章程在案先是日本委員柳原前光等去秋來津呈遞
 議約底稿一本經總理衙門函屬臣督同津海關道陳欽預為酌
 議當飭據該道逐條簽駁另擬條規預防流弊臣並鈔咨兩江督
 臣曾國藩請其督飭蘇滬洋務委員一體悉心酌核務集眾思免
 貽後悔昨復據署蘇州藩司江蘇臬司應寶時江海關道涂宗瀛
 會函呈送現擬日本通商規條一本大致按照日本原約及陳欽
 所擬備稿參以上海從前辦過案據近日各國通商條款斟酌損
 益該司等又以通商稅則必須另訂其條規未盡事宜亦須另立
 章程庶免日後辨論所慮均甚詳密與曾國藩奏稱明定章程不
 外體制與稅務兩端實相脗合該司道等擬議規條均係預為籌

度以備與該國使臣屆期會議尙是未定之局臣已先後錄送總理衙門查核惟日本距蘇浙最近士商往來已久現雖尙未立約而在滬之日本男婦已有百餘人散居西洋租界該國並有官員留滬約束商民是南省聲息易通官場情形較熟將來如果立約通商一切稅務交涉尤以上海爲總匯天津尙無東洋人往來情事閒有隔閡議約伊始一有不慎易滋流弊臣上年接見委員柳原前光等告以該國使臣前來必先由滬經過可卽就近轉請南洋通商大臣會國藩代奏請

旨派員在滬會議該委員等堅稱必須赴津臣又詢該國當派何等官職據呈出日本官位相當表內有外務省專管通商其首領曰卿曰大輔係正三位從三位之職與中國正從三品相等據稱前來中國議約大員不過正從三四位之流似此則中國屆時只

須

欽派三四品官爲全權大臣方於體制相稱柳原前光等又稱該國使臣約於今年三月間成行現已節過清明輪船迅利恐其不日駛至自應豫行籌畫以收集思廣益之助查布政使銜署江蘇布政使按察使應寶時辦理上海洋務十餘年熟悉情形明達大體堪以委任可否請

旨敕下兩江督臣曾國藩江蘇撫臣張之萬轉飭應寶時查探日本使臣過滬卽由該臬司酌帶委員附搭輪船迅速兼程來津籌商辦理屆時再察看日本所派大員是何職位酌量奏請

欽派與之會辦臣仍隨事妥商期於大局有裨所有日本議約關係緊要遵

旨豫行區畫請調大員來津商辦各緣由謹繕摺由驛具陳伏乞

皇太后

皇上聖鑒訓示謹

奏

口外兵米擬辦商運摺

同治十年三月二十六日

奏為張家口糧臺征兵食米擬辦商運暨置辦口袋荆筐酌定價
值恭摺仰祈

聖鑒事竊據口北道奎斌稟稱上年十二月間奉飭派員赴張家
口設立糧臺辦運口外征兵糧石已將察哈爾官兵應需口糧按
月發運吉林黑龍江馬隊備帶三箇月裹糧按起辦給惟宣屬邊
塞苦寒多種雜糧粟米一項閒有鄉民完納官糧之餘赴市糶賣
本不甚多張家口鋪戶所積粟米現經糧臺采買一空若仍在本
地零收萬難接濟若往京東一帶采辦每石需銀二兩上下再加
運腳每石約銀三四兩若在附近各屬零星收買山路盤運官為
經理每石亦需銀二兩有奇目前各路官兵先後出口立待輓運
亟應設法籌備現與張城各鋪戶議明由該商等分赴各處廣為

購買連運腳包貼在內酌申定價每米一石運至張家口交卸給
 銀一兩八錢先定買五六千石以後市價如有長落隨時察核稟
 辦再由張家口至烏庫各城均數千里須兩月始能運到逐日上
 馱卸載長途磨擦口袋最易損壞裝網必求牢固現用牛毛袋裝
 米外加連蓋荆筐筐內墊用乾草再用粗繩標網月以巨繩結束
 為梁搭於駝背仍用木棍扣緊庶可致遠臺站駝隻疲累每駝僅
 馱兩袋每袋裝米八斗所用牛毛袋每條合銀四錢五分連蓋荆
 筐每箇合銀三錢五分入夏以後大雨時行仍加用油布口袋遮
 護除將張家口運至頭臺運腳並棘繩草束油布袋等件事竣遵
 照例價核實造銷外所有現辦牛毛袋荆筐價值暨商運米價請
 奏咨立案等情前來臣查戶部則例內開辦理軍需所需官兵口
 糧臨時查明情形確訪時價奏明采買又同治三年戶部變通軍

需報銷摺內聲明西北辦理回務一應軍需凡製備采買有應隨時隨地酌量變通之處先行奏咨備案事竣造銷各等語茲查該道所稟張家口粟米不敷采購現擬招商辦運米價並製備牛毛口袋連蓋荆筐等價均尙覈實應請

旨敕部知照除咨戶部外理合恭摺具陳伏乞

皇太后

皇上聖鑒謹

奏

籌議口外調兵運糧緩急摺

同治十年四月二十三日

奏爲口外臺站車駝缺乏征軍轉運孔亟續調赴庫官兵擬請暫緩派撥以便專籌糧運恭摺覆陳仰祈

聖鑒事竊臣欽奉二月十一日

上諭張廷岳等奏庫倫前調防兵難以分撥並探聞回匪意圖東犯各摺片著李鴻章再於直隸所屬各鎮酌調兵一千名派員管帶馳赴庫倫與前調宣化官兵一併聽候張廷岳等調遣等因欽此又奉三月二十日

上諭張廷岳等奏請飭直隸續調官兵迅速到防等語前調宣化官兵一千名此時計可出口所有續撥之兵著卽飭令趕緊部署早日成行等因欽此又奉四月十九日

上諭軍行糧食最爲緊要該官兵裹帶行糧轉瞬卽將罄盡亟應

源源接濟著飭令口北道廣爲購辦陸續運解前諭李鴻章續調直隸官兵一千名前赴庫倫究竟會否調派何人統帶定於何時起程著該督卽行奏聞等因欽此先是臣疊奉

寄諭遵卽緘商直隸提

臣

傅振邦擬由古北口練軍各營內酌量

派撥官兵一千名遴員統帶以備續調正在往返籌商復奉此次

寄諭仰見

聖主瞻懷邊徼軫念征軍

訓示周詳

聖謨廣運跪聆之下欽悚莫名惟查張家口至庫倫四十六臺至烏城六十四臺皆係蒙古沙漠地面內地官兵奉調出口辦裝有費裹糧有費從征數千里外又非旦夕卽可撤防必令內無室家之慮外無飢潰之虞始可責以效命軍士習知邊塞艱苦往往憚

於遠役卽如此次大同官兵到口後環求調劑情詞迫切幾釀事
端經文盛多方開導復爲奏請每兵一名賞銀五兩始於四月十
三日分起就道宣化練兵奉調之初經臣嚴飭臺局將應需各項
妥爲籌備數月始克成行甫至三臺地方車駝短少應付極形竭
蹙復經該鎮王可陞督飭統帶游擊徐平川設法催趲臣復允以
到防後代催糧餉兼籌養家必無缺乏而後前進本年調防烏庫
馬步官兵已有五千餘人沿途臺站儲備柴米應付車駝苦累已
極若再添調直兵隨後繼進無論畿輔練軍不宜抽調空虛遠道
赴防能否得力支久而臺站先有坐困之勢糧餉尤有不繼之時
此增兵之難也各營軍裝糧械專恃各臺車駝挽送前經文盛籌
借駝匹每臺分撥一百隻數月以來飛挽接運殆無虛日陸續倒
斃現堪驅使者每臺僅有駝二三十隻雖續經雇車雇駝竭力幫

運專供弁兵乘騎已屬不敷周轉更難兼顧糧運疊據口北道奎
斌稟稱前由糧臺發運之米各臺均有停積四月以前運米並無
油布袋遮蓋堆積草地設遇雨水必至蒸變大同官兵約於五月
初三日始能全數出口其時節交夏至盛暑之際駝隻例須放青
不能再任負載文盛派員赴錫林等處雇覓車輛亦未知能否應
手各軍陸續抵防裹帶之糧卽將罄盡專盼後路接濟牛車笨滯
日行不過三四十里又不由臺站行走道途較爲紆折夏令大雨
時行尤難剋期運送設米石日久遇雨蒸變卽使轉解到營亦恐
難資兵食此籌運之難也凡此二難皆口外用兵實在情形臣於
去冬欽奉

諭旨徵調卽飭委逐細確探深知塞外艱窘迥非內地可比與其
兵多而無益於事不如兵少而餉可持久疊經奏蒙

聖鑒在案現在杜嘎爾行抵哈爾呢敦以馬匹疲瘦水草缺乏蒙古生計維艱需用各物皆難應手尙在貢鄂博地方駐紮未能按程邁進是其明徵伏查此次文盛等籌備臺站轉運應付不遺餘力無如天時物力均有所限口外各城旣非產米之區全恃內地購運一有不繼貽誤匪輕儻臺站因疲累而逃散前軍因飢乏而譁潰耗費損威所關更鉅此尤臣私憂竊懼者耳所幸蘇彰阿帶吉黑馬隊已抵烏城宣化頭起步隊亦卽抵庫據口北道探詢口外商人均稱庫倫等處甚屬平靜並無賊信宣軍探稟亦同目下甘省西北靈甯一帶回氛肅清兵力甚厚烏城又有大枝勁旅駐紮今昔時勢本自不同卽使竄來零匪斷不能越烏城而東犯庫倫且宣化所調官兵夫計一千三百餘人訓練尙爲整齊協防庫城似已稍壯聲威但令後路糧藥如期運解該處餉項按月放

給若遇緩急當有可恃臣現飭口北糧臺俟大同官兵行走畢後
卽稟商文盛將各臺存積米麪趕緊趲運並將五六月應需米糧
提前運解以免夏令遇雨阻滯各軍枵腹堪虞其續派古北口練
兵一千名仍飭預爲整備俟秋涼後臺站駝匹敷用屆時烏庫兩
城如續有確實警信再行調派出口庶於軍情大局有裨臣久在
行閒習知用兵之難首在足食孔聖垂訓必不得已先議去兵而
後議去食其理千古不能易也歷考漢唐出塞之師數月必還其
時口外有征無防卽我

朝雍乾年間故事大舉沙漠權設臺站亦不過一半年卽撤軍換
防未有久屯重兵於漠北無糧無賦之地者今時財力艱難如此
臺站疲累如彼不在徵調之無兵而在饋運之難繼是以微臣始
終審慎未敢稍涉張皇僅以遵

旨調派一奏塞責愚慮所及不敢不據實瀝陳以備
采擇所有續調赴庫官兵擬暫緩調派以便專籌糧運接濟征軍
各緣由是否有當謹恭摺由驛覆陳伏乞

皇太后

皇上聖鑒訓示謹

奏

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

查閱大沽礮臺片

同治十年四月二十三日

再臣因天津教案各國賠卹銀兩大致議結中外商民均甚相安於四月十二日輕騎減從馳赴大沽北塘海口一帶查勘形勢並察度防軍布置礮臺營壘從前僧格林沁設防大沽南岸原有三營礮臺五座今僅存一營內礮臺三座其原紮郝家莊河口礮臺已被洋兵拆去洋房佔住北岸原有兩營礮臺三座今僅存一營內礮臺二座臺基尙爲得勢惟臺上兵房礮洞板薄土鬆面面受敵斷不足以禦外侮四圍營牆亦甚卑薄牆根爲海潮所齧木椿土坯易就傾壞礮位旣少佳品架具多不齊全現在洋船來往口內並有洋人常往礮營左右窺探消息臣思海疆要口不可不設兵防備卽不得不逐漸培修密飭大沽協副將羅榮光督率兵夫擇要興築先將營壘加挑堅厚作裏外夾牆俾弁兵可護身抵敵

又擬於礮臺前面仿照洋式加築護臺高出平地數丈俾我能擊人而又防人之擊我臺頂不至十分喫重又牆外宜添築攔潮土壩一道免致潮汐侵刷惟沿海四五十里內斥鹵不毛土性鹹散不可取築僧格林沁當日亦由內地運土應用其餘一草一木無非購自遠方異常昂貴核計工料卽就原營礮臺布置堅穩已需十數萬金津郡無此財力只有隨時籌畫如湊出若干經費卽飭做若干工程現設礮位均係崇厚勸捐湊集大半粵東土礮固不如洋兵近日新礮之精亦遠遜外洋前數十年之礮臣已飭調舊存蘇局大小炸礮及江甯礮局製成洋礮陸續運津並委員添購西洋新式巨礮數尊以備酌量更換操習凡此之類需之歲月籌有款項庶幾稍有可觀然亦不過聊壯聲威未敢遽云禦大敵也至北塘與大沽犄角相距三十里咸豐十年洋兵從此登岸進攻

抄襲後路關係亦要該處尙存南北岸礮臺三座近年並未撥營
駐守頽廢益甚臣現調通永鎮總兵周得勝帶遵化練軍一千名
移紮北塘設法布扼徐圖修整總之海防較內地之防費餉十倍
禦外夷較禦內地之賊費力十倍目今各國洋人進踞堂奧海口
之險彼此共之門戶已爲洞開而防務未便棄置臣查閱旣畢卽
於十七日回津所有海口礮臺擬籌布置情形理合附片據實密
陳伏乞

聖鑒訓示謹

奏

盛軍欠餉廣額片

同治十年四月二十九日

再查前甘肅涼州鎮總兵周盛波廣西右江鎮總兵周盛傳所統
淮軍盛字傳字等營自同治元年成軍後陸續添併隨剿粵捻各
逆素稱得力歷年積欠餉項甚多因糧臺支絀難以籌補商之各
營弁勇情願報捐稟請歸於鄉試院試加額等情當經札行糧臺
報銷局司道會議詳辦去後茲據覆稱盛字傳字步隊九營兩哨
餉項截至同治七年底止除先後補發外計應報效欠發實銀二
十八萬兩該營弁勇多隸皖省核計報效欠餉銀數請照章分別
加廣中額學額又查前提督楊鼎勳所部勳軍報效欠餉案內聲
明留存銀八萬六千兩零係歸江皖兩省加額存俟淮軍續有報
效銀兩再行併計彙辦奉部覆准在案茲將前項留存銀兩內撥
出銀四萬兩爲皖省加額之款彙入此次盛傳兩軍報效款內共

成銀三十二萬兩其餘四萬六千餘兩係歸江蘇省加額之款仍請存記彙辦以符原案查部咨奏定加廣中額章程內紳士商民捐資濟餉一省捐銀十萬兩加廣一次文武鄉試中額各一名又新章不准請加永遠學額改為一屬捐銀一萬兩准廣一次文武學額一名等因詳請核

奏前來臣查盛字傳字各營官弁勇丁共體時艱願將積年欠餉報效實屬深明大義合無仰懇

天恩敕部查議彙同勳軍報效欠餉尾款以三十萬兩加廣安徽省文武鄉試一次中額各三名以二萬兩加廣安徽合肥縣一次文武學額各二名其勳軍報效欠餉內劃歸江蘇省加額銀四萬六千餘兩仍照案存記彙辦以符定例除將該營欠餉實數分晰開單咨部外理合附片陳明伏乞

皇太后

皇上聖鑒敕部覈議施行謹
奏

覆陳湘淮營制雜支定章片

同治十年五月初六日

再勦捻軍需自同治四年閏五月起截至五年十二月底止第一案報銷內湘淮馬步各軍支領柴草油燭折價一款經戶部議奏以軍需則例並無官兵既支薪糧又支柴草油燭之條惟據冊稱淮南河北樵薪維艱星夜馳擊必須油燭尙屬實在情形擬將本案此項用款准其就數開銷此外各路軍營悉不得援引爲例嗣後各軍營用款如爲例案所未備應恪遵同治三年欽奉

諭旨先行奏明辦理等因當經轉行遵照在案臣查軍營兵勇向多藉樵薪爲名滋擾鄉村同治四年以前湘淮各軍柴草一項先飭由地方官籌捐采辦供支迨奉調勦捻行營無定所歷淮北豫東直隸等省與前在江南時地不同經會國藩與臣飭行各營一律由糧臺籌給柴草折價步隊每營月支銀一百六十兩馬隊每

營八十兩是以大軍到處兵民尙屬相安其油燭一項因馳逐追
 勦及坐營早夜巡更放哨均所必需從前支給本色未能劃一復
 經酌定步隊每營勇夫六百八十人月支折價銀三十兩馬隊每
 營二十兩其各營有多一二哨者亦按人數增給俾軍行無所掣
 肘此皆必不可省之款又查馬隊刊本章程內載每哨雇大車一
 輛由糧臺發價以為隨營馱運鍋帳子藥之用嗣經酌定雇車一
 輛每月給車價銀二十兩如係購買之車每輛月給餽養銀十四
 兩劉銘傳所部銘軍奔馳尤苦步隊各營亦仿照馬隊章程支給
 車價銀一百兩惟銘字正營洋礮營開花礮位子藥倍於他營每
 營月支車價銀二百兩蓋洋鎗礮軍裝子藥笨重異常往往軍行
 緊急仍須隨時添雇業經據實造報請銷有案上年臣奉
 命督師陝西調防畿輔疊次購買馱駱駝並奏調蒙古捐駝分

發各營以資長途隨營運載各項飭令盛宇武毅等步隊每營月
給駝騾餒養銀一百兩凡一營六哨者月支銀一百五十兩非此
則騾駝必不能養調撥亦不能靈以上柴草油燭車價餒養等項
所費無幾而軍實較充惟均係例案所未備據金陵軍需報銷局
司道詳請具

奏前來理合遵照定章附片陳明伏乞

聖鑒敕部立案施行謹

奏

臣等竊維立憲之初

必先求聯合意願以資推行

臣等竊維

立憲之始必先求聯合意願以資推行

立憲之始必先求聯合意願以資推行

立憲之始必先求聯合意願以資推行

立憲之始必先求聯合意願以資推行

張家口糧臺請撥部餉摺

同治十年五月初十日

奏爲張家口糧臺辦運烏城征兵口米懇

恩續撥部餉接濟要需恭摺仰祈

聖鑒事竊照察哈爾吉林黑龍江各起馬隊調赴烏城宣化練軍
調赴庫倫防剿遵

旨在張家口設立糧臺飭委口北道奎斌辦理經臣奏蒙

飭部撥發餉銀三萬兩解交該臺應用並奉

寄諭以軍行糧食最爲緊要飭令廣爲購辦陸續運解等因各在
案茲據該道稟稱自上年十二月閒開辦以來截至本年四月底
止駐紮哈爾呢敦之黑龍江頭三四起吉林二三四起達爾濟管
帶之察哈爾前後起官兵應支口米均已解至七月調赴前敵之
貢果爾一軍及蘇彰阿帶赴烏城之吉林頭起黑龍江二起馬隊

副都統杜嘎爾隨帶官兵應支口米均已解至八月但使臺站接
起接運勿稍停滯可不致誤軍食統計運過各軍粟米五千餘石
吉黑兩軍加增白麪九萬三千二百餘斤所需米麪價值暨製辦
牛毛袋荆筐棘繩以及運送腳價夫工雜支添做遮雨油布袋等
項共在前領部餉內支過銀二萬五千六百餘兩僅存銀四千兩
有奇現奉察哈爾都統文盛飭由糧臺預辦全軍四箇月口米及
時提前趕運遵將米石口袋等件趕緊購備宣化一軍業抵庫倫
兼籌運腳等項現存銀兩不敷甚鉅稟懇續撥部餉等情前來臣
查各起馬步官兵先後馳抵防所應需口米必應提早辦運俾無
缺誤該道動用經費均甚撙節所稟前撥部餉不敷應用委係實
情相應仰懇

天恩飭下戶部續行籌撥銀三萬兩仍由順天府尹派員就近領

解赴張家口糧臺交收備用以濟要需而裕兵食統俟事竣彙數
核實造報所有續撥部餉辦運兵米緣由理合恭摺馳陳伏乞

皇太后

皇上聖鑒訓示謹

奏

請簡全權大臣議約摺 同治十年五月二十日

奏爲日本使臣將抵天津預行請

旨簡派全權大臣及隨同幫辦大員在津會議立約事宜恭摺具

陳仰祈

聖鑒事竊臣承准軍機大臣字寄同治十年二月二十七日奉

上諭李鴻章奏預籌日本通商事宜請調熟悉洋務大員來津商

辦一摺日本通商議約伊始尤宜慎之又慎自應預行籌畫江蘇

按察使應寶時熟悉洋務飭令查探日本使臣過境卽酌帶委員

附搭輪船兼程來津由李鴻章督同辦理等因欽此查應寶時於

五月十四日業經抵津據稱在上海探悉該國使臣於五月中旬

起程由滬北上是以先期來津聽候隨同商辦等語臣一面督同

該臬司及署津海關道陳欽再將所擬約稿悉心斟酌以備臨時

奏稿十八
辯論正在核辦閒適接該國使員柳原前光照會前來內敘所派
全權大臣暨輔翼參事隨員等銜名並該國主寄呈璽書禮物及
使臣起程日期各等因似該使到津日期計已不遠謹將照會鈔
錄恭呈

御覽惟議約事宜辦理在卽合無仰懇

天恩俯賜簡派全權大臣及幫辦大員以專責成而資贊畫至該
使照會內所稱派出之大藏卿伊達係屬從二位之職與臣前陳
來使不過正從三四位之處稍有未符合併聲明所有日本使臣
將抵天津預請

派員辦理緣由恭摺由四百里具陳伏乞

皇太后

皇上聖鑒訓示謹

奏

奏

奏

謹將日本使員外務大丞柳原前光照會鈔錄恭呈

御覽

爲照會事去秋明治三年九月本大丞齎書到津預議通商事宜
疊蒙貴中堂暨大理寺卿三口通商大臣成林款接優待成就遠
使來意俾得再奉總理王大臣准以換約信函回國乃於客冬閏
十月二十五日到京繳差外務卿及大輔接准該函回文甚爲欣
悅當經奏呈睿覽卽召本大丞等渥賜獎賞矣回維所以然者皆
由鼎力裁成銜感憲德實無涯浹茲我朝廷以貴國總理衙門函
文爲憑於本年四月二十八日特簡從二位大藏卿伊達爲欽差
全權大臣帶從員單官員遣于貴國委令結好定約又援國廷接
遣各國公使成案我天皇特具璽書禮物寄奉貴國
皇帝駕前永以爲好所有使員准於本月中旬由橫濱乘舟啟行

理合亟由全權大臣照會貴中堂預請照料一切事宜惟以素未
拜韓姑令本大臣卽就郵便馳報除外務卿及大輔所有謝覆總
理王大臣之公函應附由全權大臣齎呈外本大丞趕緊先報貴
中堂祈卽查照預爲咨部從優施行須至照會者

計開使員名單

欽差全權大臣從二位行大藏卿藤原朝臣宗城

伊達氏

全輔翼正四位行外務大丞兼文書正藤原朝臣前光

柳原氏

全參事從五位守刑部中判事兼外務權大丞源朝臣眞道

津田氏

全全 正七位守文書權正鄭永甯

全隨員

後文書大佑葉重寬

穎川氏

全全

前大學中助教源朝臣惟清

宮下氏

全

外務權大錄藤原朝臣知一

齋藤氏

全
文書權大佑葉雅文穎川氏

全
文書少佑藤原朝臣遠津久井氏

全
外務權少錄藤原朝臣豐憲土子氏

全
大藏省附屬源朝臣豐明小曾根氏

全
大藏省附屬橘朝臣成種滿川氏

僕從約計二十八

奏稱十八

奏稱十八

奏稱十八

奏稱十八

奏稱十八

奏稱十八

續派防庫練軍暫緩起程摺

同治十年五月二十九日

奏為遵

旨續派古北口練軍赴庫協防揀員統帶酌給餉乾籌備雨具號衣等項擬俟臺站疏通糧運無阻再行飭催起程恭摺仰祈

聖鑒事竊臣欽奉四月二十七日

上諭張廷岳等奏回匪出竄請飭續調官兵到防著李鴻章仍將續派古北口練兵一千名妥為整備剋日起程以資厚集等因欽此又奉五月十八日

上諭直隸續派古北口練兵一千名著催令剋日起程前赴庫倫以備張廷岳等扼要分紮等因欽此遵即恭錄咨行直隸提督傅振邦妥籌辦理復與該提臣往返函商擬派古北口練軍中右二營兵丁一千名赴庫協防飭該管將弁預為整備查有副將銜儘

先參將順義營都司賈吉齡謀勇兼優訓練得力堪以派令統帶並札練餉局司道查照宣化征兵章程預行籌給三箇月餉乾令其裹帶餽糧又現交夏令雨水頗多月飭仿照宣兵置備皮衣成案每兵一名酌發銀二兩五錢以資製辦雨具該官兵月需食米亦照宣軍定章於應領正餉加餉項下每兵一名扣出銀一兩以七錢發交口北糧臺作爲購辦米麪價值以三錢扣解藩庫作爲屯糧折價按季轉發俾資養贍家屬此項銀兩仍由直隸省局按月籌給其餘應領餉銀到防後卽由庫倫辦事大臣照章接續支放又練兵號衣旗幟長矛等項均尙整齊但恐道途寫遠雨溼損壞並令趕緊月製一分以備替換俟餉項分別給領需用各項製辦齊全應卽督催起程馳赴庫城協同防剿不敢稍涉遲誤惟查宣化馬步練兵業於四月二十七八日全隊行抵庫倫據統帶官

徐平川等馳報並偵探員弁稟稱沿途臺站因本年各起征兵接續出口飛挽運送殆無虛日蒙古困苦已極各臺駝隻大半倒斃其僅存者又以疲乏過甚節交盛夏應行放青實屬不敷載運口北糧臺所運米麪各臺停擱尙多現抵烏庫各軍日虞乏食若再令古北口官兵剋期進發臺站供億不及尤難兼顧運糧前敵立有飢潰之患又據口北道奎斌稟稱探聞二十一二三臺忽報潰散察哈爾都統文盛傳諭未運出口糧米暫行停發又聞大同官兵尙有一半截留在二十一臺以前等語是前臺因虛驚而潰散晉軍雖已去而復留其續調直軍必須稍緩起程以免前後壅滯目下情形似以整復臺站趕通糧運爲急尙不在添兵之遲速擬

請

旨飭下察哈爾都統迅將臺站駝隻趕緊設法籌添保護先令運

路疏通各臺停積米包一律起解俾已經到防之軍不致枵腹譁
潰庶未經起程之軍亦可隨後繼進所有遵

旨續調古北口練軍揀員統帶並籌給銀兩擬俟臺站疏通糧運
無阻再行起程各緣由謹恭摺由驛覆陳伏乞

皇太后

皇上聖鑒訓示謹

奏

蘆鹽礙難加價摺

同治十年六月初一日

奏爲長蘆鹽斤礙難再議加價恭摺覆陳仰祈

聖鑒事竊准戶部咨議覆西征糧臺翰林院侍講學士袁保恆奏請權加鹽價以濟軍餉一摺行令兼管鹽政各督撫轉飭運司鹽道體察現時商力民情悉心籌議據實覆奏等因遵卽行司妥議詳辦茲據長蘆運司恆慶詳稱蘆鹽行銷直豫兩省道光二十二年籌辦海防每斤加價京錢四文旋因銷數日滯節次停減引目道光二十八年查辦鹽務酌改章程案內查明額引滯銷由於私鹽侵越議將鹽價仍復舊制以期便民敵私嗣於咸豐九年海防善後經費支絀又奏請無論京外引鹽每斤徵復價京錢四文同治六年豫省防餉緊急又將豫引每斤加價制錢二文自疊次議加以來鄰私充斥額引滯銷加以近年河道淺阻腳價倍增包墊

課款商力難支曾據眾商稟懇請將前項復價加價分別停減詳蒙具奏在案歷年定議已加之款方因有礙銷數籲請停免若再議增價商力疲憊其何能支體察情形實屬難以照辦至原奏謂一省獨加則滯各省同加則通查引鹽之壅滯不盡在官鹽之侵銷而在私販之充斥價能加於鄰省之官鹽不能加於無引之私販況蘆綱定章向係包額一經認辦無論鹽斤是否全數銷完各商應交課款均令照額包納亦與別省情形不同如不兼顧銷路但議增價恐額引銷售愈滯各商無力包墊不惟加價無著且恐正課日虧再四籌商所有長蘆鹽價應請免再議增以恤商艱而保課帑等情詳請覆

奏前來臣查袁保恆原奏係爲停止捐輸裨助屯餉起見但使商力稍可支持自應勉爲籌勸無如蘆綱積疲已久運商苦累異常

自道光年間勘議加價行之未久卽以有礙課引悉予停減咸豐同治以來因海防經費支絀不得已而有軍需復價之議又因豫省防餉無出不得已而有河南加價之議近年銀價增昂運道淺阻商人成本愈重各路私販愈多銷數日滯課項日短是以上年曾國藩暨臣先後奏懇分別減免復價加價等項以冀稍紓積困挽救全綱是已加之價正在籌請停免豈可更議加增該司所詳委係實在情形相應據實覆陳伏乞

皇太后

皇上聖鑒謹

奏

日本使臣到津片

同治十年六月初九日

再臣欽奉五月二十二日

上諭派爲全權大臣辦理日本通商條約事務並派應寶時陳欽
隨同幫辦茲接據日本使臣伊達照會六月初七日帶同隨從人
員行抵天津約期拜謁當卽照覆訂於初九日巳刻在署候晤該
正副使五人來見甫經列坐卽起立先請

聖安次相問候禮貌詞氣均屬恭謹並面遞該國外務卿致總理
衙門照會一件除轉寄總理衙門拆閱外臣告以業經奏奉

諭旨派爲全權大臣一切皆應在津商辦該使唯唯應諾並問何
時互看憑據當與訂期在公所地方公同閱看容俟議立條約恪
遵

指示督飭應寶時陳欽悉心籌辦總期周密妥善仍隨時相機辯

奏報伏乞
論稍有端倪再行專疏具陳所有日本使臣抵津日期理合附片

聖鑒謹

奏

海防支應局報銷摺 同治十年六月十二日

奏爲查明天津海防支應局收支餉需按款分造清冊請

旨敕部核銷恭摺具陳仰祈

聖鑒事竊據天津支應局長蘆運司恆慶署津海關道陳欽天津道丁壽昌會詳以津郡辦理海防應需原練續練新練之洋鎗礮隊挑練馬隊通永鎮標大沽協標等營馬步官兵雲字營水師礮船馬隊直字營馬勇餉乾銀兩向在於鹽斤復價洋藥釐捐天津關洋稅東海關協餉甯河釐捐項下隨時動支按照海防章程撙節支放所有同治九年正月初一日起至六月三十日止收支款目業經造冊詳蒙

奏咨准銷在案嗣於上年十一月間奉文行知令將應發餉銀通盤籌畫量入爲出嗣後月餉卽隨時會商動撥詳報以免遲誤年

終冊報仍核實詳請奏咨不可稍有浮冒等因茲查前蒙署通商
 大臣派委候補外委一員津標兵四名會同各國水師兵官在於
 船泊處所巡查彈壓應支薪水口分錢文奉部覆准歸於海防案
 內造銷在津各營洋鎗礮隊兵勇移駐營盤朝夕操練按照直隸
 練軍步隊營制量為核減每營添募伙兵四十五名以供炊爨每
 名月給口分銀三兩並因續練鎗隊不足一營由礮隊內挑出官
 三員兵五十名撥歸鎗隊習練以足一營之數其分段彈壓郡城
 內外之天津鎮標官弁二十二員兵二百六十名以地方安謐於
 閏十月十六日撤回原營又通永馬隊弁兵奉飭挑選精壯暫留
 當差其疲弱不堪用者裁撤歸伍計裁去弁兵三十八員名於十
 二月初一日遣回原營其調赴歸綏防剿之洋鎗礮隊官兵直字
 前後兩營馬勇應需行糧等項仍按照三箇月撥解一次至建蓋

各隊營盤兵房修理大沽疊道檔牌並分別給與各營習練洋鎗礮隊改練馬隊水師礮船公費及大沽礮臺演礮經費均蒙前通商大臣隨時奏明先後奉准部咨仍照舊章歸於海防案內報銷現將收支各款截清日期造具細數清冊詳請

奏咨前來

臣逐加覆核計自同治九年七月初一日起至十二月

三十日止共收過鹽斤復價洋藥釐捐天津關洋稅東海關協餉甯河釐捐等項銀二十三萬八百七十兩五錢二分九釐五毫共支過官兵勇隊薪水口糧俸廉餉乾鹽糧公費及現任文武各官借支養廉委員薪水聽差護局夫勇渡夫工價米折口糧看守藥庫弁兵薪水口分津貼洋鎗礮隊改練馬隊水師礮船公費大沽礮臺演礮經費兵丁衣帽棺木修理各隊營盤添製帳房旗幟號

袪及一切軍火子藥等項運送軍火委員盤費騾腳局書工食油

燭紙張租賃民房等項遵照部定章程應請戶部核銷銀二十萬九千六百四十三兩六錢五分二釐一毫九絲三忽二微應請工部核銷銀二萬四千六百二十二兩八錢一釐九毫五絲七忽二微二其應銷銀二十三萬四千二百六十六兩四錢五分四釐一毫五絲四微內除本案內扣收平餘銀三百二十三兩一錢七分四釐七絲九忽儘數動支外計不敷銀三千七十二兩七錢五分五釐七絲一忽四微均係隨時籌款墊支並承辦各員請領未發之款應俟奉准部覆後再行分別辦理除將送到清冊咨部查照外理合恭摺具

奏伏乞

皇太后

皇上聖鑒敕部核銷施行謹

奏

奏

三

卷之六

六

請飭迎提防庫糧石摺

同治十年六月十五日

奏爲口外臺站潰散糧運阻滯請

旨飭令設法迎提保護以通運道而濟兵食恭摺馳陳仰祈

聖鑒事竊臣欽奉六月初四日

上諭出征馬隊需用糧餉極關緊要福濟等請在張家口設立總局由口北道專司其事按月源源運送一面由烏城派員在霍呢齊等處迎提飭令口北道赴張家口或派員前往妥爲辦理等因欽此遵卽恭錄行飭欽遵去後茲據口北道奎斌稟稱查張家口糧臺自上年十二月間設立以來揀派委員收發糧米仍由該道常川往來親自督辦一切均屬妥便似可毋庸另議更張至各營口糧截至五月二十二日止駐紮寫遠者已起運至九月駐紮較近者亦已起運至八月以糧臺所發米數計之若運道無阻兵食

原不致缺惟十九臺至二十三臺聞警潰散停運糧米業將兩旬
雖經察哈爾都統奏明挑撥牧羣駝馬趕為運送並調撥官兵保
護運路時逾半月尚無端緒臺站停運一日之糧各軍即增一日
之餒現又聞得二十五臺霍呢齊地方被賊竄擾臺站復有潰散
所調駝馬官兵又不能剋期而至糧臺現有備存米三千數百石
因糧路不通無能為力稟請

奏飭設法迎提保護等情前來臣查張家口糧臺現由口北道奎
斌就近督辦均尚妥協自應循舊辦理惟口外臺站疊因各起征
兵出口駝隻紛紛倒斃不敷運送致糧臺發運米石各臺均多停
積經臣疊次奏飭俟宣大官兵全數啟行後趕緊設法趨運俾資
接濟在案乃大同征兵甫經出口賊勢日漸東趨致布魯圖所屬
喜喇穆呼爾等五臺聞警潰散此係烏庫兩城正站為各路文報

餉需往來要道關係最爲緊要目下二十五臺復有驚潰之信慌
亂情形可想而知無論調兵運糧皆非臺站復設以後不能暢行
現在已運糧石旣恐因停阻而遺棄續調練兵又何從取道以遄
征杜嘎爾所部缺糧已久宣化征兵裹帶之糧亦已告罄前敵立
有飢潰之虞早夜籌思萬分焦灼口外地面專隸蒙古直省委員
呼應不靈該道固束手無策卽文盛檄催各臺駝馬及調撥左右
兩翼官兵前往護運聞亦整頓須時緩不濟急惟有仰懇

天恩飛飭副都統杜嘎爾將二十五臺以下存積之米迅速派隊
迎提到營暫濟各軍口食仍酌派隊伍擇要扼紮以護續運之糧
一面

飭催新任察哈爾都統迅將已潰各臺設法招復保護月籌安速
運法催趨接運庶幾以速補遲並懇

敕下庫倫辦事大臣就近在恰克圖采辦糧石接濟宣軍俟臺站
疏通再由口北糧臺解還是否有當理合恭摺由驛五百里馳陳
伏乞

皇太后

皇上聖鑒訓示謹

奏

日本議約情形摺

同治十年七月初六日

奏爲日本使臣在津議約辦理漸有端倪恭摺具陳仰祈

聖鑒事竊臣於六月初九日將會晤日本使臣伊達等大略情形

附片陳明在案十二日奉

旨知道了著卽督飭應寶時陳欽悉心籌辦務臻妥善等因欽此

臣查各國在津議約歷屆辦理雖有成案而日本與中土最爲鄰

近又自託於同文之國自宜更加詳慎當卽督飭應寶時陳欽細

查日本與泰西各國所換條約及中國與泰西各國交涉年來已

形之弊另立兩國修好條規通商章程將和約字樣暨顯有窒礙

之處併行改去逐句逐字講求斟酌釐爲兩冊由臣詳加覆核於

十六日發交該使臣閱看先於十四日據該使將彼國現擬約稿

呈送前來臚列各款其條約則鈔襲布國稅則章程則鈔襲美國

又將去秋柳原前光等在津所呈議約底稿作爲廢紙惟事事援
照舊章不免諸多流弊臣正在逐條簽駁聞十八日據該副使柳
原前光等送給應寶時陳欽公函必欲准照西約成例隱有挾制
之意經臣密囑應寶時陳欽公具覆函詞意略加峻厲使知我有
定見不爲浮議所搖該使等接信後徘徊旬日乃將臣所酌擬條
規章程簽商數處約同應寶時等先行面議七月初四日應寶時
陳欽會同該使伊達宗城等逐款推敲大致均已允服遵照惟彼
於章程內請添凡兩國准予別國優恩及有裁革事件無不酌照
施准一條雖與本年曾國藩摺內所指不可載明一體均霑等語
措詞稍變而命意仍同終屬含混因與之再三辯論據稱各國均
有此條堅求一視同仁以至體面若將此條刪去須從緩議商等
語揣其詞氣似尙漸就範圍儻固執如前亦當相機竭力開導安

與酌定以示限制而免流弊容俟公同定議畫押後再行據實陳
奏外所有日本議約現在辦理情形謹繕摺由四百里具陳並鈔
錄日本副使柳原前光等與應寶時陳欽來往公函各一件恭呈
御覽伏乞

皇太后

皇上聖鑒謹

奏

謹將日本副使柳原前光等公致江蘇臬司應寶時暨署津
海關道陳欽函稿並應寶時陳欽公致日本副使柳原前光
等之覆函各一件鈔呈

御覽

日本副使柳原前光等來函

同治十年六月十八日

昨接尊稿約底展閱再三深悉臺意專欲特異於西例以示兩國
別開生面之意實出貴國優待鄰邦之隆情既知所感激又不能
無所周處故敢布腹心夫修好通商之款雖由兩國主權訂立其
休戚必與別國相關此敝邦之所以留心注意於此行者也日前
伊欽差發東都時各國公使有來送行者詰以此行將與清國結
盟連衡等說伊欽差應之曰但看他日約成便知其實一笑而別
是以擬議須照貴國准與西人成例一體定約庶不致生嫌疑去

年柳原等來津欲奉本國信函面遞總理王大臣則云不可遽令
 來京致與泰西各國歷屆成案不符是知鄰好之不足以破西人
 格也今觀來稿將其條款錯綜套脫令人火費解說方知事例大
 約與西人同而其不同者亦復不少與伊欽差擬議所望大相逕
 庭矣又其每款所有兩國應如何行云云及海關稅則有不可彼
 此一體照行者何則兩國各有安置遠人得宜成案專令來者遵
 行以昭劃一故除其中兩國同例可遵外不可求諸貴國亦不可
 加諸己國以紊常例耳天下之人聚此一國必明條約以敦交際
 則此條規即天下人之大道一人得而行者千萬人亦得而行凡
 西人之所望於我我之所拒於彼必援別國條例為辭故交際之
 道祇可劃一不可特異開例自破條規以招彼之覬覦也今兩國
 欲於天下人中特立好看字面之約何益於事且其條規章程斷

斷不可輕重之於西例欲重之也西人妒而分之欲輕之也西人侮而詆之況今兩國均有西客旁觀出入頗生枝節兩國所議之約或有參差非謂不能通行且謂使者不力亦何面目歸國反命乎如我兩國真誠至好不重在條規而重在交際今貴國將條約必欲立異僅改字面徒使西人懷疑含妒恐非兩國之福貴國於西人事以不治而治閱歷已久自有老謀深識明燭其故何待他人喋喋而論當今之計惟有互相切磋琢磨內求強富外禦其侮而已誠能心照意援如其條規章程不若姑從西人跟跡無事更張不露聲色以穩其心之爲愈也惟冀諒察仍依原呈約稿改刪一二字面或有應加數款即可添入其中以便早日酌議定妥是望

應寶時陳欽復日本副使函

同治十年六月二十一日

昨接來函以條規須照西約不欲別開生面恐啟西國猜疑似於
送去條規尙未逐細體會試爲執事略言之貴國特派大臣前來
原爲通兩國之好若以迹類連橫慮招西人之忌則伊大臣不來
中國痕跡全無更可周旋西人豈非上策何計不出此乃於到津
後始鯁鯁過慮耶日前送去條規以貴國素曉漢文非泰西各國
可比故議論悉求允當詞意必極周詳然亦並無奧義深文何至
遽費解說真耶僞耶殆託詞耳又條規兩國並說不與西約一律
良以貴國與中國相去較近非但貴國市舶絡繹前來卽中國賈
帆亦聯翩東渡迴異泰西遼遠有來無往故措詞均用綜括以昭
平允其海關稅則彼此有互異者固已載入章程未嘗強不同者
使之同也去歲執事來津曾言貴國遣使之意不重在通商故條
規卽以修好爲名以期不拂貴國雅意中國原無成見不過因人

以誠求我卽以誠應耳來函乃謂特立好看字而並云斷斷不可
輕重於西例果爾則是同文之國亦須鈔襲俚俗字面乃爲有益
耶且不知送去條規較西約何者重何者輕希卽一一指明用開
茅塞來函摘去歲總署復書與泰西各國歷屆成案不符一語爲
不能破西人成格之據不知此語係指未經立約之國不往赴京
而言非謂條規卽可照鈔也若欲照鈔則條規但載兩國通商事
務各照西約辦理一言可蔽何必多費筆舌乎總之中國與貴國
不能有來無往則西約斷不能盡同今來函因字面少異西約卽
深惴惴不知條規中並無可令西人生疑之處卽第二條大意亦
係美約所載非創見也貴國既有戒心自可無庸相強夫中國非
有所希冀欲與貴國立約也特因去歲情詞懇切並送來十六條
均以兩國立論其中雖有數條未能妥洽餘尙可采是以我中堂

奏准派使前來會議此次尊處送到章程全改作一面之詞薈萃西約取益各款而擇其尤竟與去歲擬稿自相矛盾翻欲將前稿作爲廢紙則是未訂交先失信將何以善其後乎我中堂又將何以覆

命乎茲本幫辦等會商擬將前送條規章程彼此再行酌商刪併以便早日定議如尊意必不謂然祇好轉請中堂將貴國遽改前議不欲守信之處據情具

奏或仍照總理衙門去歲初議照舊通商和好毋庸立約更可不用露聲色也前此晤談未經道破者以執事皆通才卓識一見條規自必豁然無庸覩縷也今來函如此云云實非初念所及敢以直告卽維照督不宣

日本約章繕呈底稿摺

同治十年七月十五日

奏爲日本國訂約通商甫經議定謹將會擬條規章程先行繕呈御覽恭摺仰祈

聖鑒事

臣

欽奉同治十年七月初九日

寄諭李鴻章奏日本議約漸有端倪並將往返信函鈔錄呈覽一摺日本與中土最近又自託於同文之國現在議立修好條規通商章程自不必沿襲泰西各國舊套該督督飭應寶時陳欽與該使臣反覆辯論大致均已允服遵照惟章程內請添凡兩國在予別國優恩及有裁革事件無不酌照施准一條仍是一體均霑之意亟宜相機開導使之就我範圍應寶時等覆該使臣信函頗足折服其心卽著李鴻章飭令應寶時等力持定見悉心開導總期妥與酌定以示區別而杜弊端並將辦理情形隨時具奏等因欽

此仰見

聖慮周詳實以綏徠之始不妨於曲示懷柔而立法之初不可不預存限制祇承之下悚勵交深查此案經臣督同應寶時陳欽堅持定見與之不時辯論更冀乘機迅速決議免其遲延日久又生他計連日於所擬稿本內彼此標簽往復駁詰每一條或附入浮簽四五雖已漸有端倪究屬兩無成說非由臣面加剖斷不能絕其觀望之心遂允訂於初八日在臣行館面議該正副使等屆期齊到臣督同應寶時陳欽與之逐條確商隨機指駁凡涉及緊要關鍵一經議允卽援筆改定所有前經簽商各條尙不過於刁難惟彼所力爭而固執不化者條規開首必欲我

皇帝與該國天皇並稱章程內載兩國國號必欲清國與日本並稱又所懇求而狡猾莫測者則在於仿照西約一體均霑假如前

一條依其說則是中國約章刊列彼主非常之尊號將來可以徵
信於史冊目前更可以陵轍東洋誇耀西洋而彼得獲其名矣後
一條允其請則援照西約事例可以入我內地處處買遷我不能
與之爭而彼得獲其實矣該副使柳原前光頗習華書深悉中西
和約利弊曲折堅欲伸其所說臣與應寶時陳欽多方開喻舌敝
唇焦至於無可抵賴之處彼則不論東西洋情形各異而專以伊
國歷來稱謂辦法不能改易為詞意頗翹然自負臣乘其措語罅
漏偶厲聲色以折之謂若存牢不可破之見此事只可罷議該使
始俯首允遵所有條規開首渾含其詞及章程內分寫兩國仍稱
中國及日本字樣均尙得體其均霑一層決不許用該使復婉求
改用各口取益防損隨時商辦等語臣執筆改為如彼此海關
章程嗣後有變通之處隨時商辦等語列為第三十一款蓋海關

收稅各有隨時變通絕無絲毫流弊也是日辯論已歷三時之久
各款粗定臣方謂其別無齟齬孰意柳原前光陡然又啟詰問欲
將章程內業經議定內地不准通商二條重新翻悔臣與應寶時
等極力分析該副使總以洋土貨進出內地通商已久該國不能
獨異於西國幾於無可與辯臣思此條乃彼所注意凡諸說皆不
足以拒之惟推原西洋立約之意華人往彼國通商並未限定口
岸今日本係以入口岸與中國通商華人既不能到彼內地貿易
日本人亦豈應入中國內地貿易新章此條兩國從同確乎公允
何得引西約以爲例西人亦斷不相詆侮該使聞之語塞臣猶慮
異日或有反覆遂於章程第十四款進口貨不准運入內地第十
五款不准入內地置買土貨兩條之末添敘云以上兩款係因兩
國各有指定口岸故須明定限制等語如此明白揭出俾以後無

可藉口此款實與均霑一層異事相因若均霑之請得遂卽援案一切准行雖有內地通商之禁只屬具文彼所以始而漫許也茲均霑之望旣絕而通商曾無限制獨設爲不入內地之條豈肯甘心彼所以繼而翻悔也此條爲洋人必爭之利而實我內地受病之源是以論從前通商之弊此爲最重名爲指定口岸而洋商運洋貨入內地暨赴內地買土貨條約旣有明文迨後定子口稅章由海關給領單照前往沿途免再徵收稅釐經過內地關卡驗放又只以有無完過稅單爲憑不問其人之是華是洋由此而內地各處皆可以爲通商之地內地商民皆可以冒洋商之名流弊滋多然西洋之成局無如何矣內外通商及地方衙門方且互相維持思所以補救於萬一今安得又聽日本之無端闌入耶其人貧而多貪詐而鮮信其國與中土相近往還便捷其形貌文字悉與

華同以此攫取我內地之利浸移我內地之民操術愈工滋害必
愈甚更非西洋比也臣故知此次議約以杜絕內地通商爲最要
只以相習既久相形見絀能否獨爲禁阻實未敢預期有何把握
茲經明定限制尤望各海關臨時辦理妥設範圍將來或值修改
章程仍須重申界限耳至於條規中所籌維者第一條載明兩國
所屬邦土不可稍有侵越等語隱爲朝鮮等國預留地步第十三
條載明此國民人在彼國有犯兇盜及諸重大案情或聚眾十人
以上由地方官分別會辦或逕行嚴辦等語隱爲前明倭寇故事
預設防範夫各國通商以後各海口幾爲列國公共之地絕非一
國所能爲寇而東南遺事相傳人人談虎變色此條設律從嚴詳
加科斷亦足以防微杜漸稍釋羣疑他如第十條之戒雇主徇庇
工人有犯查拏訊辦第十一條之戒彼此往來不得攜帶刀械第

十六條之戒領事官辦事不合查明撤回悉取鑒於歷年交涉成案求免臨時棘手此擬定修好條規之預杜流弊者也其章程中所籌畫者如第一款於中國通商各處概標以某口字樣免似舊約有瓊州等府城口含混之弊第五六等款於罰款則分別兩國數目重輕免至各生校量第十三款游歷均照舊章而執照必發給安分之人第二十一款預商官棧辦法以便兩國商民第三十二款言及重修章程必須彼此兩願悉酌於本案交涉情形求免將來掣肘此擬定通商章程之預防流弊者也伏查此案經曾國藩議以不外體制與稅務兩端總理衙門原奏所云上無礙於國體下有益於商民二議實為賅括臣稟遵疊奉諭旨督飭應寶時陳欽悉心籌畫凡思慮所能到者不敢不旬斟字酌庶冀稍免滯礙仰慰

聖廡現在起繕正本剋日在公所會同畫押除俟辦理竣事再行具

奏外所有議定條規章程先行繕呈底稿緣由理合恭摺由驛具陳伏乞

皇太后

皇上聖鑒訓示謹

奏

日本議約完竣摺

同治十年七月二十九日

奏爲辦理日本國議約通商訂立條規章程現已完竣恭摺奏祈
聖鑒事竊臣欽奉同治十年五月二十二日

寄諭李鴻章奏日本使臣將抵天津請派大臣在津會議立約一

摺已另有諭旨派李鴻章爲全權大臣並派應寶時陳欽隨同幫
辦矣該大臣俟日本使臣到津後務當督飭應寶時陳欽悉心籌
畫杜漸防微總期周密妥善免致將來窒礙是爲至要本日簡派
全權大臣諭旨一道一併發往如該使索看憑據卽著李鴻章另
行恭錄給與閱看俟議約事畢此旨仍繳還軍機處備查等因欽
此同日並奉到

諭旨一道恭錄行知江蘇臬司應寶時署津海關道陳欽一體欽
遵洎日本國使臣伊達帶同隨員人等於六月初七日到津會晤

後往復辯論經臣於六月初九七月初六十五等日已將辦理情形疊次

奏明鈔錄會議擬定條規章程底稿恭呈

聖鑒並先後函達總理衙門各在案當卽飭由應寶時等督繕條規章程各正本而日本所備一分係用漢倭字體合寫又於漢文未甚熟習至七月二十七日始據繕完訂於二十九日在公所會齊辦理屆日臣率同應寶時陳欽該正副使臣伊達柳原暨繙譯等到齊後彼此校對繕本均無訛誤分別畫押鈐印一律竣事此案立議之始係以修好條規爲重輔以通商章程用漢倭文分繕合訂二分彼此存留一分以備屆期互換其稅則各項向係查照海關舊章辦理不在互換約本之內今日本究屬初辦兩國稅則本有區別故須分析載明除將存留一分備文封送軍機處代爲

進

呈其稅則卽連同通商章程附在條規訂本之後以便屆時發交刊辦所有欽奉

諭旨一道另行敬謹封固咨繳軍機處備查至此次議約與歷辦西洋條約不同前經兩達總理衙門聲明謹遵成案於恭錄

諭旨之內節存條約二字未錄以備該使臣索看憑據免其有所藉口迨後卽執定不同西約之說與之往返辯駁卒以蕝事別無要求惟立意欲求進京一行拜謁總理衙門王大臣等以致其奉使遠來殷殷嚮慕之忱經應寶時陳欽稟商以進京一節已在條規中議定允行未便阻止且約事業經議定無從更生異說該使臣等定於日內起程查有因公來津之江蘇記名海關道孫士達熟悉情形臣已委令該員伴送前往妥爲照料並咨明總理衙門

查照矣所有辦理日本國議約竣事緣由理合繕摺由驛具

奏伏乞

皇太后

皇上聖鑒訓示謹

奏

請嚴禁遏糴摺

同治十年八月二十一日

奏爲直屬現辦災賑招商購運米糧擬請蠲免釐稅嚴禁遏糴以廣招徠而資接濟恭摺仰祈

聖鑒事竊查本年順保津河等府霖雨成災河隄潰漫居民蕩析情形極爲困苦仰蒙

恩准截漕十萬石並由江浙采辦賑米四萬石藉資撫卹業經臣嚴飭地方官確查戶口核實分散以期實惠及民無如災區甚廣水勢未退秋禾旣顆粒無收春麥又補種不及約計賑米有限勢難普徧而自冬徂春待哺之日甚長不能不資轉移於異地全賴商賈輻輳源源購運以輔官力之所不及訪聞奉天江南東豫等省秋成告豐糧價較減已飭天津道丁壽昌派員攜銀分赴產米豐收之區設法購辦以備搭放平糶並招勸殷實紳商給發護照

趁新穀登場時多方購買准其運赴被災處所按照市價售賣臣
先通飭直境應完釐稅概予停免俾商人有利可圖庶米販漸多
價值自減民間日食或無騰踊之虞惟商米經過各省局卡應完
釐捐又州縣官吏往往因鄰境荒歉任意遏糴卽如近日臣接據
山東署德州知州蔣樹屏來稟以民間存米無多請禁止赴該處
購辦等情查德州歲事尙豐距直最近豈可膜視鄰災強分畛域
設他處皆藉詞效尤商販必聞風裹足來源日乏糧價日昂民生
日困可憂方大畿輔爲根本之地關係至要亟應暫議通融辦理
稍資補救擬懇

天恩飭下奉天江南山東河南各將軍督撫府尹將商人應完米
糧釐捐暫予停免其由臣派員招商采運飭各關卡驗明護照免
稅放行俟來年麥收成熟後再行照章抽收並出示嚴禁地方官

紳固戶邊糴居奇斯遠近商賈得以流通災區糧價不至驟長億
萬饑民同霑實惠庶於時局有裨理合恭摺由驛具陳伏乞

皇太后

皇上聖鑒訓示謹

奏

上聖賢傳

大

少也... 聖賢傳... 卷之二

截留京餉尾數片

同治十年九月初七日

再上年十二月間臣因通籌津郡海防月餉奏懇將戶部指撥津海關十年分常洋兩稅銀十五萬兩預行截留經部議准令陸續籌解毋庸拘定期限本年四月間臣復行飭該關道俟徵收稅項可敷防餉餘存銀兩卽行報解嗣據將徵存常稅銀四萬一千八百三十四兩零於七月間委員埽數解部交納現准戶部咨行七月二十五二十七等日奏催京餉並飭催欠餉各摺奉

旨依議欽此並催令將指撥京餉如限措解復經轉飭欽遵辦理去後茲據署津海關道陳欽詳稱該關本年洋稅因江海各關所發免單過多夏秋雨水過大銷市不旺收數較減計自九年十一月第四十二結起至十年八月第四十四結止其徵收洋稅銀三十一萬三千六百餘兩內除撥機器局四成並八分經費一分二

釐火耗外核計六成洋稅止有十八萬八千餘兩本年正月至八月共發過支應局海防軍餉銀十八萬二千餘兩核計歲底月餉尙欠銀十萬七八千兩且奉部招商采買洋銅價值運腳已籌發銀三萬三千餘兩又奏撥水災賑撫銀五千兩又英布各國教民賠款稅務司月支薪水等項均在此款動放是以更形拮据卽下結洋稅續有徵收屆時封河收數諒亦無多不特本年京餉難以解齊卽海防月餉亦恐難照數籌撥等情詳請核奏前來臣查該關道所詳委係實在情形竊念部庫根本攸關際此帑藏支絀之時但有分毫可籌自當力圖接濟是以於未准部咨以前卽飭將該關常稅儘數報解惟海防軍餉每年計需四十萬兩有奇除由運庫提撥復價銀十萬兩外以六成洋稅爲大宗其人不敷出臣已於去冬專摺瀝陳懇請截留京餉旋准部覆許以不拘限期是

臣不得已之苦衷早邀

聖明洞鑒夫理財之道不外開源節流二端今源無可開若爲節流之計惟有將海防各營酌量裁撤以冀稍省供支勻給部庫第津郡爲通商要地京師門戶不可一日無備現值災歉飢民流匪難保不乘機煽動尤須重兵彈壓再四籌思未敢出此更無兼顧之策統計本年奉撥京餉已解過常稅銀四萬一千八百餘兩又奉部采買洋銅價腳銀三萬三千兩應就數劃抵津海關尙短解銀七萬數千兩惟有籲懇

天恩俯念海防緊要將本年短解京餉尾數准予截留俾資周轉並懇

敕部將津海關來年應解京餉酌量減撥實於防餉大局有裨是
否有當伏乞

奏
聖鑒訓示謹附片具

教案內俄案月結摺

同治十年九月初九日

奏爲覆審天津教案內誤斃俄國人四犯分別定擬恭摺仰祈
聖鑒事竊照上年五月二十三日天津民教滋事一案經督臣曾
國藩等將緝獲各犯分別按擬於同治九年八月二十三九月十
三等日兩次具奏欽奉

諭旨會國藩等先後定擬正法之犯二十人軍徒各犯二十五人
卽行分別辦理等因欽此臣當因事關中外交涉派令天津府知
府馬繩武先往英領事兼法領事李蔚海暨俄領事孔氣處告知
各情詎孔氣指出案內扎死俄人之兇犯田二等四名央求緩決
臣查該四犯辦抵原以償俄人被害之命俄領事既有異詞若遽
行辦結仍屬了而未了又未便因此致稽全案使法國藉爲口實
惟有仍遵

諭旨分別辦理之意卽於九月二十五日將殺死法國人之正犯
馮燭子等十六名先行正法其田二等四犯監候另辦分咨刑部
暨總理衙門查照並於閏十月十六日奏報洋務大略附片中聲
明教案應抵兇犯俄領事力求緩決現飭天津道府與之妥議咨
有定局再行請

旨酌奪各等因在案臣當時偵得俄人實情旣要卹銀不肯再殺
多命致受法國教案牽連爲津市俄商重結仇怨中懷忌慮而姑
以犯供不實爲詞藉圖延緩時該國新派駐京使臣倭良嘎哩甫
抵天津照會三口通商大臣成林轉咨前來並有此案大致在務
得眞兇照例懲治不在人數多少等語臣卽札行天津道府令其
再將該四犯確實供詞詳細備具節略照會俄領事俾知該犯等
實係眞兇並飭馬繩武往告該領事以中國辦理命案自有定例

本處只知遵

旨執法此非該國所得干預該領事旋來臣行館謁見據稱犯供並無在何處地方殺死俄人及何人下手殺傷某處首從莫分礙難轉呈至中國百姓應由中國官遵定例治罪惟望逐細研鞫實情俾昭憑信又該國雖被殺斃男女三命並不計抵償之多寡亦不在判決之遲速等語臣以該領事所言尙爲得體且深曉我國律例卽告以津民起事只與傳教法人爲難實與俄人無仇奈人眾倉猝莫由分曉誤殺俄人照中國誤殺比例原未便科以死罪只爲有關中外交涉大局格外嚴辦今若嫌犯供尙未詳細當令道府覆加研訊先送草供與領事閱看彼此蓋印爲憑然後再議如何照例擬罪該領事亦無異說十一月初旬又來謁商並遞申陳稱奉彼國公使飭令照約會訊定供當經查照俄國和約第七

條第八條大意面與駁斥並札復該領事約內只云會同商辦實無會訊明文不容牽混嗣又據申陳奉彼公使來文卽照臣言不必會訊仍請令孔領事一見該四犯以照信讞並諄求臣處札行該領事遵照去後其時津郡紳民聞有四犯緩決之說眾情歡躍公具稟帖託俄國事主薩寶寶洋行寄呈倭使代囚犯乞恩併稟道府臣聞知當囑道府暫勿申詳而該領事旋函致天津府聲述倭使文稱商民欲有所言當由總理衙門備文送交該大臣方能代爲轉奏等語是該使欲藉商民公稟奏達伊國爲轉圜地步又欲總理衙門備文送交以爲見好張本似與情理相合若論中國辦案常例斷不容紳民代求減免惟歐羅巴風俗輕國法而重輿論彼族來中國通商與官爲難卻不肯與百姓爲難茲就公稟一節亦可示以民情固結不宜重辦之意當卽據情加函咨請總理

衙門備文送交經該使轉寄彼國京都據稱須俟回文方可辦理
臣與總理衙門往復函商皆以此舉出自俄人之請應俟自爲轉
圜不必加以催促且須有明白回文爲據不能以一時口說爲憑
至於命案而關係交涉機宜自應於兩國照約會辦之中仍不失
中國依律定讞之法方得體要臣屢飭津海關道陳欽天津府知
府馬繩武與該領事面晤時將中國通行律例如何分別重輕以
及刑部秋審一定辦法明晰告知彼以照例辦理是否仍係死罪
爲疑繼聞有原情緩決遇赦減發之條頓覺欣然總理衙門王大
臣會晤該使等亦嘗以斯言相激動至本年五月閒彼國甫有回
文允照分別減等辦理該領事孔氣亦稱接到倭使委彼會辦之
文並函致馬繩武仍與該守會議持平辦結以全終始臣復密加
指示飭與領事和衷商辦務期允協茲據天津府知府馬繩武詳

稱天津民教滋事案內毆死俄國人之田二張順段大項五等四名該府提案覆訊該犯等實係傷斃俄人正兇只因當時到案心慌未供詳細復經傳同要證陳吉升等質訊明確錄供申請照會俄國孔領事知照嗣接領事函稱已經奉有札文不必會訊應再訊取確供覈實擬辦正在提訊聞卽據天津縣紳士前代理山東鄒縣知縣王鏞等一百四十五名又鋪商陳光耀等一百十五名公同赴府稟稱該犯田二段大張順項五等與俄人素無嫌怨亦不認識只因聞有洋人打官鬧事之言心生氣忿各自持械前往救護適與俄國男女三人途遇誤認爲卽是打官之洋人致各毆傷殞命揆其一時忿激之心係爲救護官長而起核其三命死傷之由實係冒昧誤認所致較諸懷挾私仇預謀糾毆殺人者迥不相同事後追思悔恨無及罪雖應得情有可原籲懇據情詳

咨總理衙門照會俄國欽差大臣奏懇法外施仁原情免抵等情
查此案孔領事屢請照例辦理應將該四犯查照律例擬罪一面
提犯覆鞫錄取切供詳蒙咨請照會俄國駐京公使申送該國京
都茲蒙札准總理衙門咨據俄使照覆現接本國來文將送到各
項文詞並紳商等公稟細心查核擬將該犯等照所犯之輕重分
別定罪減等辦理等因鈔錄照會行令妥擬核辦又接孔領事函
稱仍與該府持平辦結稟奉諭令照約會同商辦遵復與領事往
返函商擬定四犯罪名開摺呈核並疊蒙咨明總理衙門各在案
誠恐尙有不實不盡復經傳集案證提同各犯逐加覆訊緣田二
張幘順段大卽段起發項五均天津縣人田二段大向俱切賣西
瓜生理張幘順項五俱傭趁度日與俄法各國人素不認識同治
九年五月二十三日午後田二等因傳聞法國人打官滋事心生

氣忿田二段大各執西瓜刀張幟順項五各持團練所用順刀長
鎗先後趕往救護行至河東藥王廟地方遇見俄國二男一女洋
人各坐肩輿被眾人圍住停歇田二等誤認爲打官之法國人田
二上前將女洋人抓出肩輿順用西瓜刀砍傷其脊背一男洋人
卽趨至女洋人背後將女洋人抱住田二又用刀砍傷女洋人左
肋段大亦用西瓜刀向砍男洋人右腰眼致傷男洋人鬆手與女
洋人倒地其另一男洋人所坐肩輿已被眾人擠破走出張幟順
卽用順刀將洋人頂心砍傷該洋人用手遮格又被張幟順砍傷
右手背項五亦用長鎗幫扎該洋人左腿倒地詎二男一女洋人
俱因傷殞命田二項五先自回歸段大張幟順隨同眾人將各屍
身連兇刀一併擲棄河內回家經官訪拏先後按名被獲遂與先
時拏獲兇犯馮癘子等共二十名訊供開摺呈經前督臣曾國藩

奏明正法擬抵嗣蒙飭將田二等四名片辦行由天津道督府疊次訊取確供茲遵飭照約會同孔領事妥商定擬復經提犯覆鞫據各供晰前情不諱案無遁飾查律載因鬪毆而誤殺傷旁人者以鬪殺傷論其故殺人而誤殺旁人者以故殺論又鬪毆殺人者不問手足他物金刃並絞監候故殺者斬監候又其毆人因而致死下手致命傷重者絞監候又棄屍水中者杖一百流三千里不失屍者減一等又二死三流各同爲一減注云謂犯斬絞死罪減一等卽坐流三千里犯流三千里者減一等坐徒三年又犯徒流而父母老疾無人侍養者止杖一百餘罪收贖存留養親又例載流犯照數決杖枷號四十日准存留養親各等語此案該犯田二張幘順段大項五因聞法國人打官滋事趕往救護途遇俄國三人誤認爲打官之洋人各用刀鎗砍扎三人致傷身死均屬不法

查田二段大各斃一命張愾順項五係共毆一人致斃惟項五鎗
扎左腿一傷並非致命張愾順用刀砍傷頂心係致命部位應以
張愾順當其重罪該犯等誤斃三命雖因救護官長情切並非挾
嫌私鬪第其所殺俱屬洋人應如俄使所請照所犯之輕重分別
定罪以昭公允而敦睦誼查張愾順與段大棄屍不失律應擬徒
係屬輕罪不議惟其與田二各自用刀疊砍二傷係屬有心欲殺
情節較重均應按律問擬田二張愾順二犯應依因故殺而誤殺
旁人者以故殺論故殺者斬監候律擬斬監候請照孔領事會同
該府議定稟明章程應入三次秋審減等發遣如遇
恩赦卽予減等毋庸計及秋審次數段大項五二犯各用刀鎗砍
扎均止一傷情節較輕應於因鬪毆而誤殺旁人者以鬪殺論鬪
殺者絞監候律上減一等擬杖一百流三千里段大照擬發配折

責安置項五所供母老丁單是否屬實應否留養飭令天津縣傳同地族人等訊取供結照例詳辦該田二等被獲到案已及一年只因孔領事節次會議並由駐京公使轉申俄國京都往返需時以致久羈囹圄既經會議定案未便拘牽成法本年秋審現已無及應候咨請刑部通融彙辦等情徑詳前來並據天津道丁壽昌會同天津海關道陳欽據情加勘轉詳聲請

奏咨辦理等情臣覆加察核所議尙屬平允除將全詳供招分咨總理衙門刑部查核外所有天津案內誤傷俄國人致死照例另擬四犯罪名並先後商辦定擬各緣由可否

敕下刑部附入本年秋審彙辦抑請

旨卽將田二張幟順二犯照擬免句遇赦減等之處謹會同兩江

督臣曾國藩合詞恭摺具

奏伏乞

皇太后

皇上聖鑒訓示施行謹

奏

古北口練軍出口摺

同治十年九月十五日

奏爲飭催古北口練軍分起出口日期請

旨分飭察哈爾都統檄令臺站防護弁兵互相照應並由庫倫多派駝隻迎引以免遲滯恭摺仰祈

聖鑒事竊

臣疊奉

寄諭飭催古北口練軍迅赴庫倫防所均經恭錄行飭欽遵辦理又奉同治十年九月初七日

上諭古北口練軍疊經催令出口現在庫倫待援甚急著嚴飭賈吉齡統帶遄行馳赴庫倫毋任延緩等因欽此復經飛飭趕緊拔隊去後茲據宣化鎮總兵王可陞轉據都司賈吉齡稟稱該軍右營弁兵於九月初三日拔赴張家口當奉察哈爾都統慶春飭令管帶官游擊蔡瑞山督帶頭起官兵於九月初六日點驗出口其

餘各哨每起百名閒日前進該都司親率中營弁兵准於十二日
赴口接續進發又據駐防庫倫統帶宣化練軍游擊徐平川八月
二十二日探稟甘肅鎮番回匪並逃勇蒙古人皆有約其馬賊三
四千餘由山後烏拉齊向東北分股竄擾圖什業圖汗地面距賽
爾烏蘇較近各等情前來臣查目前臺站駝隻疲乏雖經慶春飭
沿途妥爲應付尙慮不敷周轉該軍分起出口每起僅百名閒日
前進人數畸零聲勢不能聯絡若猝遇大股賊匪軍裝恐致衝散
道途亦易迷失查由察哈爾臺站至庫倫必由賽爾烏蘇經過而
由賽爾烏蘇所管第九臺塔拉多倫分路赴庫茲賽爾烏蘇附近
既有賊警尤恐中途阻滯不能剋期到防相應請

懇
旨飭令察哈爾都統檄飭沿臺防護弁兵互相照應俾無疏失並

敕下庫倫辦事大臣多派驍壯駝隻飭委得力員弁帶赴二三十
臺處所沿站迎提導引迅速抵庫庶可厚集兵力保障要道不致
如前調大同官軍中道停阻防剿皆無實濟斯於軍情稍裨所有
古北口練軍分起出口日期理合恭摺由驛覆陳伏乞

皇太后

皇上聖鑒訓示謹

奏

籌撥烏城皮衣銀兩摺

同治十年九月十五日

奏為遵

旨籌撥烏城防兵製辦皮衣銀兩恭摺仰祈

聖鑒事竊臣欽奉同治十年七月十七日

上諭奎昌等奏豫籌官兵禦冬皮衣請飭直隸山西籌款采辦一摺官兵遠道出征寒衣亟宜早備著無論何款迅速籌撥分飭趕緊采辦皮衣皮褲靴帽各二千一百八十四件於九月內解赴烏城俾資應用毋稍延緩等因欽此比卽恭錄行飭口北道查詢價值樽節購辦嗣據該道奎斌稟稱口外應用皮衣等物張家口向有成做鋪戶應卽就近采辦惟近年各路軍營采購甚多陳貨既無積存新貨隨時銷售必須搜羅皮張分飭趕辦所需價值與各鋪戶核實議定羊皮大襖每件合銀二兩二錢羊皮褲每件合銀

奏稿十八
九錢五分狐皮帽每頂合銀六錢牛皮靴每雙合銀七錢五分統
計襖褲靴帽各二千一百八十四件共合銀九千八百二十八兩
外加包氈麻繩荆筐及運送頭臺車價共需銀五百兩擬在部撥
餉銀內先行墊辦以期八月內備齊起運等情臣復飭省城練餉
局司道迅速照數籌還茲據藩司錢鼎銘等詳稱遵在江蘇協餉
項下動撥銀一萬三百二十八兩派委候補知縣陳子杰解赴口
北道交收歸款詳請就款開除免其造冊報銷等情前來臣覆核
無異除分咨查照外理合恭摺覆陳伏乞

皇太后

皇上聖鑒敕部知照謹

奏

大沽海口酌定營制章程摺

同治十年十月十一日

奏爲查明大沽協添設海口六營關係緊要酌定營制章程繕單
恭摺仰祈

聖鑒事竊查咸豐八年添撥海口將弁案內欽奉

上諭前據瑞麟慶祺奏遵擬添撥海口將弁事宜一摺當交僧格
林沁察核具奏茲據查明裁移分駐之處均尙妥協著照所請所
有天津海口應添設前右營游擊一員著卽以葛沽營游擊裁移
改駐大沽協左營都司著作爲中右營都司大沽協右營都司著
作爲後右營都司應添設前左營都司一員著卽以鞏華城都司
裁移改駐應添設中左營都司一員著卽以三河營都司裁移改
駐其海口營守備著作爲後左營守備以資防守至應添千總把
總外委等弁著酌量改撥餘著照所議辦理該部知道欽此嗣經

歷任督臣將應行移撥添設各員弁大致酌辦惟海口失事時案
卷遺失臣莅任後查知大沽爲通商要地外洋輪船夾板所必經
添設六營額兵原以壯聲威而資保衛一切營制章程均未籌議
定妥無從遵守復督飭天津鎮總兵陳濟清大沽協副將羅榮光
參酌時勢體察情形逐細覈議據該鎮協查擬該營營制及應辦
事宜呈請核辦前來臣覆加酌核咸豐八年海口南北兩岸修築
礮臺奏設新兵三千名分爲左右六營九年又裁改爲一千八百
名每營三百人內字識九名兵丁二百九十一名卽將原設大沽
海口兩營弁兵歸併駐守其六營弁缺內中右營左哨千總係由
三屯營太平寨汛千總移撥後右營右哨外委把總係由天津鎮
標城守營經制外委移撥前左營左哨千總係由河閒協標左營
千總移撥中左營左哨千總係由正定鎮標王家坪汛千總移撥

右哨外委把總係由天津城守營經制外委移改後左營左哨千
總係由宣化鎮標趙川堡汛千總移撥右哨外委把總係由祁口
營經制外委移改其裁移改駐原缺月由各標酌量裁除撥抵其
餘除就原設海口兩營千把外委分撥外計添設額外外委十四
員均奉行已久尙爲妥協至該協所屬之葛沽營游擊祁口營都
司經先後移撥海口所有葛沽祁口兩營現各設守備一員應卽
作爲守備專營督帶原設弁兵照舊巡防惟該營移撥將弁有借
用原營關防鈐記辦公者有請刊木質戳記辦公者自應一律換
給新設營分官職字樣以昭信守其游擊都司關防業飭該營造
具印模清冊由臣咨部查照迅速刊鑄頒發其千把以下鈐記飭
由藩司分別刊給再將原用關防鈐記繳銷該營防守以礮臺爲
根本以牆濠爲環衛臣於本年四月閒曾將擬籌布置情形附片

陳明欽奉四月二十五日

諭旨著妥爲經理行之以漸持之以恆應需經費並著該督悉心籌畫期收得寸得尺之效不可畏難中輟致廢遠謀等因欽此仰見

聖謨廣運防患未萌曷勝敬悚自六月以後淫雨積潦營牆礮臺大半傾圮秋後暢晴始能督催將弁兵夫勤操畚鍤次第修築惟因經費支絀本年春閒飭令天津府知府馬繩武等將津郡義館釐捐認真整頓裁減蘆團義勇積存釐捐銀二萬餘兩交支應局彙存經臣節次批給大沽協副將羅榮光通永鎮總兵周得勝趕緊集料興工趁冰凍未結之先將大沽北塘兩處礮臺牆濠攔潮壩等項緊要工程核實整理冀稍就緒來春再接再續籌辦將來天津釐捐收有成數應先儘海口各防營礮臺經費斟酌動用併歸

支應局附案報銷庶幾得尺得寸不致畏難中輟至大沽協營應需俸餉津貼暨製備軍械修理巡船等費均係經久章程向由支應局正餉開支造銷應仍循舊辦理謹將酌擬營制章程繕具清單恭呈

御覽統乞

敕部照准以裨要防其餘未盡事宜容再隨時妥籌酌辦所有大沽協添設海口六營酌定營制章程緣由理合恭摺具

奏伏乞

皇太后

皇上聖鑒訓示謹

奏

謹將添設大沽協海口六營酌定營制俸餉歲修以及缺分衙署章程八條繕具清單恭呈

御覽

計開

一添設前右營游擊一員左哨千總一員右哨把總一員協防左哨外委千總一員協防右哨外委把總一員左哨額外委二員右哨額外委二員兵三百名中右營中軍都司一員左哨千總一員右哨把總一員協防左哨千總外委一員協防右哨外委把總一員左哨額外委二員右哨額外委二員分防鄧善沽汛額外委一員兵三百名後右營都司一員左哨千總一員右哨把總一員協防左哨外委千總一員協防右哨外委把總一員左哨額外委二員右哨額外委二員兵三百名前左營都司一

員左哨千總一員右哨把總一員協防左哨外委千總一員協防
右哨外委把總一員左哨額外外委二員右哨額外外委二員兵
三百名中左營都司一員左哨千總一員右哨把總一員協防左
哨外委千總一員協防右哨外委把總一員左哨額外外委二員
右哨額外外委二員兵三百名後左營守備一員左哨千總一員
右哨把總一員協防左哨外委千總一員協防右哨外委把總一
員左哨額外外委二員右哨額外外委二員兵三百名以上應請
換給大沽協前中後六營游擊都司守備關防各一顆暨歸大沽
協統轄之葛沽營守備祁口營守備關防各一顆

一各營汛地前左營專駐北岸前礮臺卽原設北礮臺中左營專
駐北岸後礮臺卽原設磚礮臺前右營專駐南岸南礮臺後右營
專駐南岸老礮臺均專司操防不兼地面中右營有分防大沽地

面後左營有分防海口地面均仍按舊制兼管該弁兵以一半巡防原派地段一半輪駐南岸中礮臺以均勞逸而重操防

一官弁兵丁俸餉等銀奏准在長蘆鹽斤復價洋稅釐金項下官員照銜缺支給兵丁不分馬步守缺每名月給實銀二兩八錢均由天津支應局按月核發彙案造報惟海濱風烈地溼將士無分寒暑操防工作勞苦異常俸餉均應按月全數給領勿稍折扣短缺如遇奉調出征將弁除支俸廉外照銜加給一半鹽糧兵丁每名月加支銀一兩以示體卹

一南北兩岸礮臺原設大小鐵礮九十三尊內有數尊購自西洋同治十年五月又添購外洋二百磅炸彈來福鋼礮二尊六十八磅炸彈開花鐵礮二尊又六十八磅炸彈開花鐵礮二尊其設礮位九十九尊內三千斤以上大礮六十四尊一千斤以上中礮

十三尊一千斤以下次礮二十二尊查原設礮臺成案奏准分別
大小礮位酌給津貼雜費每大礮一尊月支銀八兩每中礮一尊
月支銀四兩每次礮一尊月支銀二兩應由天津支應局按月核
給嗣後如有添設礮位報明由局分別給領以資整理其礮盤礮
架及隨礮器具什物遇有大件缺損隨時籌款修補更換或由局
製給

一各營除辦公字識外合計操兵一千七百四十六名以鎗礮爲
正技兼練弓箭刀矛其大小礮位按半月一次演放冬令封河以
後按期打靶擡鳥各鎗現均改用洋鎗操習西洋口令陣法按五
日打靶一次所需洋火藥礮彈鉛丸均由津局隨時照章給領彙
案造銷該營教場應在大沽村西二里餘教場舊基建造可爲操
練行隊打靶之所應用旗纛金鼓洋鎗籐牌刀矛一切軍械並由

局製備給領

一南北兩岸現存大礮臺五座平礮臺十座礮洞連房三百七十五間軍械火藥庫住房五十三間窩棚四十五架營牆九百九十四丈新築護身夾牆四百二十八丈營門四座木橋四座攔潮壩四百丈護濠一千八十丈所有牆濠臺壩地居海灘風潮衝激最易刷消應隨時修築堅固擬常年歲修外定爲每十年大修一次每五年小修一次至十年四月閒奏明擬於礮臺前面加築護臺高出平地數丈現以工費過鉅尙未興辦卽形勢扼要之處礮臺礮營亦須添築均俟籌款逐漸辦理該營尙有巡船五號巡查河面遞送公文每年封河後歸塢油艖剔換板片添置篷布繩索亦定爲每六年大修一次每三年小修一次所有現成礮臺礮洞庫房攔潮壩等項歲修大小修經費及將來添築護臺土木各工均

奏稿一
三
責成該副將先期撙節勘估再委員復勘飭由天津支應局於釐捐項下給領彙報其礮臺等工程仿照洋式核實酌辦工料須格外精堅本無例案可循又專指釐捐閒款應請免造細冊報部覈銷

一大沽協副將統領六營弁兵巡防海口責成綦重凡礮臺布置及炸礮洋鎗操法必須講求有素謀勇兼優方克勝任嗣後該副將缺出應由直隸總督揀選熟習洋操戰守得力之員奏請補授其游擊都司守備員缺均應以熟習鎗礮口令布置合法者請補以上各缺均改爲沿海題補要缺只求人地相宜銜缺相當未便拘定各班候補儘先名次或致不得其人鎗礮卽成廢物防營幾同虛設干總以下末弁如本營兵丁熟精礮法亦准升拔並請援照道光二十三年海疆添設官兵成案副參游二年俸滿都守以

下三年俸滿其赴部考驗應比照外海水師人員試演礮位毋庸校試弓箭

一游擊以下各官平日以駐守礮臺爲重暫勿建設衙署副將統轄全營兼顧前後汛地公務繁多應建衙署爲辦公之所查大沽海口後路三十里之新城地方濱臨海河最爲扼要雍正年間曾於新城建立水師都統衙署嗣後此缺裁撤城署俱廢茲擬就新城官署舊基建設大沽協副將衙署於署外圈造土城卽以葛沽營兵駐守與大沽礮臺前後接應聲勢相聯應俟籌有款項卽行估建

凌煥集錄通商成案片

同治十年十月十一日

再臣於上年冬月蒞任天津洋務關繫緊要查有江蘇遇缺題補道凌煥向隨臣辦理通商事件多年現在江甯鹽巡道署任緘商會國藩可否飭令來津而曾國藩亦以南北洋濱海設防有會商辦理之事今年三月准咨鈔奏以該署道凌煥學識軼倫熟悉洋務會商臣鴻章飭令交卸署篆前赴天津稟商防務及辦理中外交涉事件已經附片具

奏等因在案凌煥旋卽航海到津正值日本使臣來津議約臣飭該員在署稽核成案推究新舊約章利弊同異克以蕝事數月來洋務尙爲平順瞬屆冬令封河交涉之事尤簡該員本係江蘇候補人員自不必隨臣又赴保定惟臣處通商文卷不全南洋衙門冊檔繁多檢錄猝無頭緒論者謂中外通商已久而條約應行事

奏稿十一
三
例閒有隨時變通者迄無成編可考以故探討莫從入手凌煥平昔留心著述又於洋務經辦十年胸有成竹易於操觚茲飭卽日駛回金陵稟明曾國藩飭將南洋卷檔卽以條約爲綱按款彙集成案臚列章程明年春夏閒齎至天津再將北洋辦過各案擇要添入總須芟吏牘之冗繁就官書之體例由臣等覈定俾南北洋衙門各存一編庶乎遇事得所依據將來或修換新約或議訂通商律例皆可以此編爲參考得失之助似屬辦理洋務必不可少之書除咨明總理衙門外所有江蘇道員仍飭回南並擬令集錄通商成案緣由謹附片具陳伏乞

聖鑒謹

奏

覆奏封河回省摺

同治十年十月十七日

奏為遵

旨酌量情形妥籌具奏恭摺仰祈

聖鑒事竊臣承准軍機大臣字寄十月十三日奉

上諭天津為通商要地刻下飢民較多尤應妥為彈壓得該督坐鎮其閒庶幾宵小不致生心而洋人亦可免疑慮本年封河後該督應否仍駐天津暫緩回省之處著酌量情形妥籌具奏等因欽此跪聆之餘仰見

聖主塵念災區

指示機宜曷勝感悚

臣

查本年六七月閒雨水過大津郡為九河

下梢洪流橫溢平地深至丈餘其四鄉難民扶老攜幼而來不可勝數臣督率官紳就城廂內外廟宇民房分投安插並於城頭四

圍搭蓋蓆棚以資棲止日散饜米以資餬口卽令天津道丁壽昌會同運司恆慶關道陳欽總司其事迨九月後水漸消退村莊涸出丁壽昌等將就食飢民籌給錢米陸續遣歸分派廉幹員紳赴鄉查勘極次貧戶口該災民等聞將放賑亦願回家守候其在城頭蓆棚寄住之民除遣回及趁工外其餘老弱孤獨悉令移住空屋添搭棚廠僅留養五六千人分居數處街市極爲肅靜又於城外四關分設饜廠四鄉分設賑局合而計之人數固多分而贍之其勢已散且直屬近數十年水旱兵災因帑項艱難未及多籌賑濟今年水災過重臣仰體

皇上恫瘝在抱之隱截漕勸捐乞糴動款督飭司道嚴諭印委官紳勤求民瘼核實散放不准吏胥經手弊混小民具有天良感激聖恩不致聚眾爲非卽有強暴不逞之徒亦令丁壽昌等督率弁

兵嚴拏懲辦勿稍姑息察看情形民情實甚安貼丁壽昌隨臣帶
隊十餘年廉明正直曉暢事機深洽輿情凡津郡鎗礮練軍及臣
留防親軍各營均能聯絡一氣臣回省時當令該道等會督巡查
彈壓諒無意外之變前於分派冬防摺內聲明天津可保無虞蓋
已審酌再三而出之此飢民情形也臣曾任南洋通商五年在軍
務棘手時洋人口舌愈多日不暇給今任北洋通商一載有餘其
初教案餘波未結微有纏擾夏秋後交涉已簡封河後洋務更稀
海關道陳欽才力足以了之至洋人向多疑懼臣於同治二年由
上海移駐蘇州英酋巴夏禮卽來要挾臣置勿理久亦相安此次
各洋人怵於上年五月津郡之案自相猜疑欲臣駐津過冬代爲
保護而不思津案莠民亦受重懲各地方官亦均改換遭此水災
而臣等竭力籌賑執法懲奸百姓亦知感知懼何至再與彼族爲

難臣昨覆英使臣威安瑪函略將暫回省城諄屬鎮道安爲彈壓保護之語告知以解其惑旋准總理衙門函鈔與威使往復信稿亦以封河後回省係照奏定章程辦理與臣不謀而合現計在津洋人不足百名各國尙有小兵船在港守凍暗爲防備該領事等又商會關道陳欽派弁設卡巡防智慮已甚周密似無須留臣在津方可彈壓且中國大臣進止未便因洋人一言遂受牽制開河後臣不敢不駐津以防不測而衛

君父封河後臣似不可不回省以攬全綱而存政體自去冬兼辦通商以來外閒略知洋務者紛紛議論謂招懷遠人之道遠則生威近則生玩以南洋大臣長駐金陵爲是而以北洋大臣長駐天津爲非不知津郡前事可鑒距京太近必須因時制宜有未可一概論者此洋務情形也通商不兼地方恐呼應不靈上年總理衙

門原奏已詳言之惟臣蒙

恩調任直督駐津年餘尙未駐省一日直屬政務殷繁藩臬兩司
時有應商事件函牘往還至速亦須旬餘往往函牘不能盡悉者
必兩司前來面陳常虞隔閡貽誤藩司錢鼎銘等疊稟求臣早回
卽閣省官民無不思一接見臣今冬若再不回殊負眾望況河閒
保定各屬多被水災途次周視存問亦稍盡司牧之心臣前與錢
鼎銘約俟臣回省後該司再往近省各屬一爲查察以期屬員知
所做誠不獨理財用人均以省城爲根本也臣本擬月內查勘永
定河隄工程卽順道回省茲奉

旨飭安籌因更悉心察酌津郡飢民及洋務情形無可疑慮之處
目下封河在卽擬仍就近前往永定河工次逐一查勘河道工程
妥商辦法屆時津郡四鄉賑務亦經開放如民氣尙靜或再回津

稍駐或卽回省隨時

奏明辦理如封河期內此閒或小有謠惑丁壽昌陳欽與總兵陳濟清等尙能合力支持如有緊要事件臣不過數日卽可馳回兼顧並籌實於大局無礙除咨總理衙門外謹繕摺由驛覆陳伏乞

皇太后

皇上聖鑒訓示謹

奏

外省捐賑請獎片

同治十年十月十七日

再本年天津等府水災經臣奏蒙

恩准截漕撥款議辦賑撫招商運米復商同本省司道府縣倡捐廉銀勸諭紳富量力捐輸放饘助穀設局留養惟直隸地方本極窮苦加以連年歉收民間經此流離尠褐不完禦寒無具困苦萬分臣目擊情形無術補救前經備具函牘商勸江浙紳商捐辦棉衣解津散放以輔賑務之不逮曾經專摺

奏報在案嗣准升任閩浙總督江蘇撫臣張之萬函稱該督臣籍隸南皮情殷桑梓首先倡捐棉衣一千件又捐廉銀五千兩飭松滬釐捐局道員劉瑞芬辦解棉衣一萬三千件又據升任湖南臬司涂宗瀛捐辦棉衣四千件兩淮運司方濬頤勸辦棉衣折價銀二萬兩調任蘇松太道沈秉成捐辦棉衣五千件江蘇紳士記名

道員潘曾瑋勸辦棉衣一萬件前湖北鹽道盛康捐辦棉衣二萬
件翰林院編修吳大澂等在京勸辦棉衣褲各七千件湖南紳士
候選道魏綸先捐辦棉衣二萬餘件浙江紳士前蘇松太道吳煦
福建補用道胡光墉各捐辦棉衣一萬件前江蘇補用道吳雲勸
辦棉衣一萬件前記名運司金安清捐辦棉衣四千件並勸辦多
件前天津道周家勳捐辦棉衣一千件雇搭輪船派員解送來津
飭局驗收確查各處極貧災民均勻搭放臣並酌提棉衣二萬件
咨由順天府尹查明順屬被災飢民妥爲散給此外尚有兩江督
臣曾國藩籌勸淮南鹽商公捐銀兩上海閩廣湖徽各幫商人經
涂宗瀛等竭力勸諭均有成數應俟報解到日另行核明銀數彙
案奏辦伏查江浙等省兵燹之後元氣未復財力均非有餘祇以
此次直省被水災區甚廣切近畿輔流民充斥上煩

皇太后

皇上惕慮憂勤是以該官紳等無分畛域力顧大局同殷報效以

仰副

朝廷衣被羣生德意臣前在南省帶兵勦賊休戚相關一經剴切商勸遂能不吝推解其襄善舉實爲急公好義可敬可感金安清首倡此議往來勸辦尤爲不遺餘力均非尋常捐助賑務可比臣不敢壅於上

聞除升任督

臣張之萬係封疆大員應如何

加恩給獎之處

臣未便擅擬其餘隔省官紳自應先行酌獎俾示

觀感所有升任湖南臬司涂宗瀛按察使銜調任江蘇蘇松太道沈秉成按察使銜前湖北鹽法道盛康三品銜候選道魏綸先可

否均擬請

賞加布政使銜翰林院編修吳大澂兩淮運司方濬頤前蘇松太
道吳煦布政使銜記名道潘曾瑋布政使銜福建補用道胡光墉
均擬請

交部從優議敘前天津道周家勳請

交部議敘已革記名運司金安清已革江蘇補用道吳雲均擬請
加恩開復原銜頂戴以示鼓勵而維薄俗仍俟事竣核明該員等
勸辦捐戶折合銀數彙案照章分別給獎是否有當理合附片具
陳伏乞

聖鑒訓示謹

奏

南運河經費不敷摺

同治十年十月十九日

奏爲南運河歲搶修經費不敷購辦工料援案懇請酌加實銀俾資整頓恭摺仰祈

聖鑒事竊前據天津道丁壽昌詳請將南運河歲搶修銀兩自同治十年起仿照永定北運二河之例於年前先行給發由臣咨准工部議覆轉飭遵照並令將前項應領修費應如何變通辦理詳查例案悉心妥議詳候核辦去後茲據該道詳稱遵查永定北運南運三河歲搶修工料銀兩向係彙案

題奏赴部請領永定河水勁工險額定工料及加增實銀成數自難並論就北運南運兩河比較北運河長四百餘里南運河長七百餘里而原定工料銀兩北多於南北運河歲修銀一萬九千兩搶修並找領銀一萬七千兩南運河歲修銀一萬五千兩搶修銀

六千兩咸豐四年戶部變通放款章程又將三河工料俱核減一
半在司庫旗租項下接銀票各半支放核計每千兩僅領實銀二
百五十兩辦公實形竭蹶嗣永定河工料於同治三年奏准按減
半給發實銀北運河亦於同治四年九年兩次咨准每千兩給發
實銀四百兩惟南運河歷年工料未奉加增上年咨准部覆自同
治十年起每千兩准發實銀三百兩原爲南運河年久失修工大
而經費較少是以准加實銀成數而所增無多斷不敷用近年黃
流北趨每盛漲時由張秋穿運入衛南運河之險甚於北運河而
北運河原定工料及加增實銀成數多於南運河倍蓰今年伏秋
大汛南運河水勢異漲拍岸平槽險工林立至霜降後始漸消退
兩岸隄工亟應修補殘缺培厚加高若仍臨汛墊修水患恐致日
甚上關

國賦運道下繫田舍民生殊非淺鮮懇請查照北運河之例酌加實銀成數以資興築等情前來臣查直境水災由於河淤隄塌其所以淤塌之故則由於軍興以來剋減修費近二十年河員遂不復以治河爲事督臣亦不能責以徒手而治河目前似省小費究之爲害愈鉅爲費更多南運河工段較長額定工料本少現發實銀成數又少於北運河近年黃水北趨併歸漳衛等河匯入南運來源洶湧尤甚一時消道不及衝決潰漫無歲不有徒以經費過絀工料不敷年復一年隄身處處坍塌亟應及時擇要修築若論辦法須照額補足歲搶修銀兩逐年認真加培庶稍有濟惟目下帑項仍形艱窘所有南運河歲搶修工料銀兩擬請暫援照北運河成案每千兩改發實銀四百兩其歲修之款必於年前先發乘秋後百穀登場采購料物俟春融農隙次第興工再找領搶修銀

兩預備大汛防險之料責令該道督率廳汛印委員弁就款籌辦
逐段驗收儻敢偷減草率卽詳請撤參設再有漫口工程亦卽據
實參賠並請自同治十一年起按年照發其以前報銷未竣之案
飭由該道趕緊補行查報似此變通辦理俾該工料物及早購備
廳汛等亦不得以領款支絀藉口玩誤期於整理河務有裨理合
恭摺具陳伏乞

皇太后

皇上聖鑒敕部核覆施行謹
奏

南運河工請免賠修片

同治十年十月十九日

再上年南皮縣馮家淺葦子廠等處先後漫口工程緊要經臣奏撥協餉飭天津道丁壽昌督同委員實力堵築其用過工料銀一萬一千二百六十六兩五錢四分八釐一毫據該道造冊繪圖詳由臣咨部核銷嗣准工部咨覆仍令按照漫口工程銷六賠四成案分別追賠伏查南運河工料銀兩自改由司庫按銀票各半核減支發每千兩僅發實銀二百五十兩不敷太多各段工程卽不得不相率敷衍復因報銷未竣扣留領款致同治三年以後工料銀兩均尙未發沿河九州縣暨文武十七汛分管草土各工每年三汛期內雖據照常申報勘修第銀非現發料無預備工係臨急墊辦豈能稍有實濟卽如同治十年現任各官多非同治三年以前之人而其補領同治三年以前之款亦不能挪賠現辦工程查

上年六月內河水陡漲丈餘加以黑夜風雨人力難施馮家淺葦子廠等處先後漫口至一百二十餘丈該縣兵燹之後連年歉收居民多未復業工大費繁無從籌措臣萬不得已始奏明動撥協餉飭該道督同印委購料集夫堵築合龍辦理甚屬覈實現准部文行令照例分賠自爲慎重款項起見惟上年運河漫口正值天津民教滋事之時該道甫經接任查辦教案彈壓地方事事均關緊要不克分身防護迨工竣後臣覆查用過工料銀兩委無浮冒該道到任未久旣無修防不力之咎又未領到本屆歲修額款似未便責令按成賠繳致令向隅且北運工料多而現發南運工料少而扣留印汛各員弁前任現任均未領銀若令賠繳四成銀至四千五百餘兩之多必致藉口賠累亦不足以昭公允可否仰懇天恩俯准將此案應賠四成銀卽就協餉項下開除免其賠繳嗣

後仍不得援爲成例以示限制出自

逾格恩施伏乞

聖鑒訓示敕部知照謹附片具

奏

李卿穀父子請列祀典片

同治十年十月二十六日

再據直隸儘先知府世襲騎都尉李孟平稟稱該員故父前署湖北按察使李卿穀於咸豐四年在武昌省城殉難奉

旨照布政使陣亡例從優議卹並准於原籍暨死事地方建立專祠欽此又該員胞兄前署安徽巡撫布政使李孟羣於咸豐九年在六安州長城地方以飢軍數千當粵逆十萬之眾血戰旬餘餉盡援絕手刃悍賊被執不屈罵賊殉難同治元年奉

旨照巡撫陣亡例從優議卹並准入祀伊父李卿穀原籍專祠其隨同陣亡員弁一併從祀欽此現在原籍固始縣專祠業經營建工竣稟懇附

奏列入祀典又該員胞伯曾祖前甘肅都司李雲福於乾隆年間從征金川陣亡奉

奏稱十六
旨從祀昭忠祠世襲雲騎尉可否懇

恩一併附祀等情請

奏前來

臣

查前署湖北按察使李卿穀前署安徽巡撫李孟羣父

子先後死事一門忠節大義凜然李孟羣轉戰數省功績尤著專

祠旣經落成應請

旨敕下河南撫

臣

轉飭該員原籍固始縣地方官照例列入祀典

春秋致祭都司李雲福力戰捐軀可否懇

恩准其一併附祀以彰忠藎伏乞

聖鑒訓示謹附片具

奏

籌議口外轉運摺

同治十年十一月十二日

奏爲伊犁裹糧全數辦運出口各臺站積存糧袋甚多亟須設法整頓並查明烏城征餉未便由口北道辦理恭摺覆陳仰祈

聖鑒事竊

臣疊奉

寄諭飭由口北道先辦伊犁裹糧十萬斤解赴烏城又杜嘎爾請將征兵糧餉責成口北道經理飭斟酌情形辦理等因伏查伊犁裹糧檄令口北道奎斌辦齊粟米十萬斤分作六批起運頭批於九月初九日出口適因三十八九臺聞警潰散暫緩起運臣於九月二十四日

奏明在案嗣據該道詳稱所辦伊犁後五批之米已於十月初一至初五等日分批解至頭臺接收轉運烏庫各城防軍糧石亦經按月提前起解惟接據統帶古北口練軍都司賈吉齡自二十一

臺馳報沿途見各臺堆積米袋及軍械等件甚多非千餘駝隻不能運行當詢各臺辦事蒙員據稱臺站駝隻缺乏此次官兵經過俱係臨時重價雇備駝隻運送如官兵走畢卽開銷駝戶而去所堆米袋實難運送兼之發價無費莫可如何等語查各臺壓積米袋尙係七八月之糧冬令已屆尙未全數轉運嗣後若如此阻滯兵丁遠戍枵腹臨事何能用命殊增懸慮等情前來臣查各軍糧食口北糧臺均係計期預發駐庫宣化一軍每因運糧不到派兵迎提下月尙不能得上月之糧烏防馬隊聞因前以逐賊奪糧暫資餬口若指臺站轉運恐致貽誤各臺疲苦已久車駝等價又多欠發若不大加幫貼設法整頓實有難以趲運之勢前疊奉

諭旨令各將軍都統大臣妥議整頓臺站臣愚以爲察哈爾所屬四十四臺爲西北伊犁烏庫各城糧餉轉運所必經關係尤爲緊

要額勒和布莅任在卽但將此路臺站車駝趕籌添雇勿惜小費分段責成勿任疏懈俾蒙員不以困苦諉誤則征軍庶無飢潰之慮至杜嘎爾請將征兵糧餉歸口北道辦理臣查該軍糧石業經責成口北道源源籌解方慮臺站不能如期運到其餉項須按營酌發人數之多寡時日之早遲更非數千里外所能臆度是以本年春閒福濟請由直晉派員赴霍呢齊設臺支應臣將辦理窒礙情形詳細覆陳請無庸另行派辦奏蒙

聖鑒在案現在新任烏里雅蘇臺將軍金順卽由包頭取道赴烏會奉

旨飭該將軍在於隨營糧臺揀調妥員帶往烏城設立糧臺自屬畫一便捷之舉杜嘎爾防剿烏城一帶月餉或自行奏撥支放或併歸金順糧臺籌發應由該副都統與金順會商妥辦目前行營

需餉業由署察哈爾都統慶春在部撥伊犁餉內提銀五萬兩交
該營委員領解回營計足敷數月之用似無庸另議更張口外糧
食最艱該軍米麩勢不能不由口北糧臺購運其行營餉銀實未
便再由內地派員遙爲經理致滋缺誤理合繕摺由驛據實覆陳
伏乞

皇太后

皇上聖鑒訓示謹

奏

胡光墉等捐賑請獎片

同治十年十一月十二日

再本年天津等府災區較廣經臣奏明勸捐集款藉資接濟嗣江浙官紳捐辦棉衣銀兩彙片

奏准分別獎敘在案茲據改指江西補用道胡光墉函稱前因捐棉衣一萬件蒙

恩交部從優議敘該員益加感奮復添製棉衣五千件並以被水之後來春青黃不接民間生計維艱稟奉母命倡捐購辦牛種耕具庫平銀一萬兩呈由天津籌賑局驗收搭放又據長蘆運司恆慶詳據鹽商楊俊元稟稱自六月開城上搭蓋窩棚安置難民日施蒸饘至九月底止除各商籌貼外共捐給銀五千兩現除陸續遣歸尙有老弱貧民二千五百餘人移置空房改爲每日施粥二次計自十月初一日起至明春二月底止約需經費銀六千餘兩

又津郡西門外延生饘社收集各處災民除年例公指暨官紳捐
資外計放饘百日尙不敷經費銀八千餘兩該商均願自行措辦
各等情前來臣查道員胡光墉籍隸浙江以隔省紳士疊捐鉅款
實屬救災卹鄰慷慨好義長蘆商人楊俊元捐辦饘粥經費至二
萬兩之多瞻顧鄉里誼敦任卹均爲近時所罕見伏查本年春閒
湖北提督郭松林在湖南原籍捐產贍族奏蒙

賞給匾額今該員等捐貲助賑爲數均鉅可否援案籲懇

天恩准各賞給匾額一方由臣頒發祇領以爲好善樂施者勸伏
候

聖裁再准湖廣督臣李瀚章咨據湖北藩司張建基以籍隸直屬
稟捐賑銀二千兩轉解到津聲明不敢仰邀議敘等因臣查該藩
司情殷桑梓捐廉拯助擬仍請

旨交部從優議敘俾昭激勸理合附片具陳伏乞

聖鑒訓示謹

奏

采購閩米濟賑摺

同治十年十一月二十日

奏爲懇

恩飭由閩省采購米石解津接濟春賑恭摺仰祈

聖鑒事竊查本年直屬被水成災疊蒙

恩准截留江浙漕米八萬石奉天粟米二萬石又由江浙采買賑米四萬石又奉

旨添給順屬賑米二萬石暨臣派員赴奉天東豫采購雜糧俾資散放復奉十月初三日

寄諭來春青黃不接之時民力未免拮据如有應行接濟之處查明據實覆奏候旨施恩等因欽此跪聆之下仰見

聖主勤求民瘼胞與爲懷莫名欽感伏查各屬被災極次貧戶口業飭妥細勘酌照米七銀三章程改賑爲撫飭由各該州縣並

遴委委員會督紳董核實放給約計本年冬賑已足敷用民間得此賑項實惠均霑輿情極爲綏帖惟夏秋水勢漫溢入冬後高地雖漸涸退天津河閒低窪之處積水尙二三尺現已結冰未能盡涸二麥已補種不及來春青黃不接窮民生計維艱誠如

聖諭必應預籌接濟其順天府屬應辦春賑業經函商府尹臣飭

由該管道廳確查成災較重處所妥議辦法統由臣籌款均勻撥

濟核計前項截留采辦米石所餘無多所收捐項亦慮不敷分散

部庫支絀異常又未能續請添撥帑項再四焦思查同治七年間

臣與陝甘督臣左宗棠督兵勦捻曾由前閩浙督臣英桂等采購

閩米十萬石解津分濟軍食近年亦屢由福建辦米運京有案該

省內地暨臺灣等處向爲產米之區本年年收成豐稔價值較平疊

准兼署閩浙督臣文煜福建撫臣王凱泰來函以詢悉直屬災區

較廣民食維艱深爲系念文煜曾任直隸關心舊治必能協力代
籌相應請

旨飭下該督撫臣迅速采購閩米四萬石或由閩廠官置輪船或
酌量添雇商船分批趕運務於來春開河時解赴天津兌收俾資
接濟似米數無多該省籌款不甚爲難而畿疆民食可有裨助各
州縣來春分別調劑之處續行具

奏外所有請

旨采辦閩省米石接濟春賑緣由理合恭摺由驛具陳伏乞

皇太后

皇上聖鑒訓示謹

奏

漢

皇土聖德流示

皇太子

百宋敬謹首... 春融融由野命... 謝由... 具刺... 之

奏... 仰... 仰...

仰... 仰... 仰...

仰... 仰... 仰... 仰... 仰...

仰... 仰... 仰... 仰... 仰...

仰... 仰... 仰... 仰... 仰...

仰... 仰...

仰... 仰... 仰... 仰... 仰...

重修畿輔通志摺

同治十年十二月十七日

奏爲設局重修

畿輔通志仰祈

聖鑒事竊查

畿輔通志成於雍正年間迄今百四十年

聖

聖相承典章明備凡水道之遷改輿地之并分以及裁置官員增

減兵制

國家因時損益旣事例之繁興士庶仰沐

甄陶亦人文之日盛自應及時纂錄垂示將來又舊志之中體裁

未備如

陵寢應當專紀而附入

京師河渠須考源流而瓊記枝節藝文不詳書目僅列詩文釋道本屬異端竟躋人物若斯之內躋駁殊多至於河工漕運兵事海防皆屬大綱略而不紀闕者應補譌者須訂歷年既久文獻難徵若非詳慎考求無以信今傳後臣自去年履任遇有興除政務檢尋遠年卷宗輒多霉壞稽之舊志則紀述疏略亦不足以備考查思欲重修因遇水災未遑暇及今幸仰承

聖訓辦理賑撫漸次就緒與司道等籌議於保定省城設立總局延請翰林院編修黃彭年總司其事遴派樸學員紳襄同纂校移檄郡縣頒發采訪條款分門別類加意搜羅凡官書所記案牘尙存以及故老傳聞私家記述采訪不厭其詳編擇必極其慎務使巨綱細目秩然有條酌古準今堪資法式庶幾官司從政得所取裁首善之區益光

聖治以仰副我

皇上體國經野之至意至志局章程需用經費由臣督飭司道隨時籌辦所有設局重修

畿輔通志緣由理合恭摺具

奏伏乞

皇太后

皇上聖鑒謹

奏

六

六

聯珠法

聯珠法

上圖國

能

修治府河摺

同治十年十二月十九日

奏爲修治府河興復水利用過工料銀數核實請銷恭摺具奏仰

祈
聖鑒事竊查直隸之水以永定滹沱爲最鉅水皆濁流惟發源於保定府屬滿城縣之一畝諸泉匯爲府河者爲清流志載滿城諸泉曰一畝曰申泉五花紅花連寶匯入清苑縣境經省城南關大橋歷安州任邱至雄縣之清河口遂與大清河合流自前督臣方觀承疏濬一畝諸泉在靈雨寺等處分建石閘使水有蓄洩不致直瀉無餘由是府河來源常年暢旺天津及南北運河米鹽百貨檣集省城商民利賴百有餘年道光年間舊閘漸廢滿城一帶居民填河築壩堵水灌田以致淤泥壅塞泉眼枯閉上游來源不旺下游水淺商艘重載往往於船尾築壩河身益高阻滯益甚臣查

府河爲由省達津通衢水利所關豈可任令淤淺當飭在省司道
週歷履勘自府河上游一畝泉下至清河口計程一百九十餘里
勢若建瓴河身逐段淺阻甚有蓄水僅七八寸者輕船尙可浮送
重載斷難暢行悉心籌議非濬泉不足以導府河之源非添閘不
足以節府河之流遂飭將一畝申泉五花紅花連寶諸泉次第疏
濬以通泉脉河道淤淺處所擇要挑深於省城舊設五閘之外上
游添建蠻子營齊村響閘石閘三座下游添建蓮花橋新橋扇馬
廟清河口石閘四座俾得節節停蓄源源不匱庶幾漑運兼資農
商交利需用土方工料約估銀二萬六千餘兩先飭運司在於運
庫籌墊銀一萬兩由運商按引攤捐歸墊其餘不敷之款查照前

督臣曾國藩

奏明練兵河工吏治三項經費准在江南協餉項下動支事竣造

冊報銷行據該司道派委候補直隸州知州朱靖旬候補同知沈
燮同等雇夫購料於同治十年二月十九日開工先濬一畝諸泉
及經行河道四十餘里分建蠻子營等處三閘至四月閒次第興
建蓮花橋等處四閘挑挖廣福河清河口各處淺工六七月閒大
雨連旬河水漲發尙有蓮花橋新橋二閘工尙未畢嗣天氣晴霽
接續修辦於八月二十九日一律工竣經清河道陳鼐親詣查勘
一畝諸泉逐處疏濬泉源頗旺並勘明上游三閘下游四閘均高
寬如式底盤排釘木椿加以石灰和土堅築閘底用石鋪平閘座
灌漿勾縫鐵錠勾緊石後用三和磚土層層砌夯堅實閘板整齊
堅厚自省城西關靈雨寺起至清河口止測量水深七八尺丈餘
不等商船足以暢行又經臣派委候補道劉樹堂逐一勘驗委無
草率偷減情事至新建各閘已飭署保定府水利同知常森桂營

奏稿卷十八
務處委員羅慶熙招募閘夫專司啟閉並議定新舊十二閘啟閉
章程飭令該同知等嚴飭各閘夫按時啟閉不得藉端需索所有
濬泉建閘挖淺各工共用土方閘座工料銀二萬六千九百七十
兩一錢九分一釐六絲據該委員朱靖旬等開具用過工料銀兩
細數報經司道覆核係屬實用實銷由清河道造具報銷清冊會
同藩臬兩司詳請

奏咨前來臣覆核無異除冊分送戶工二部外理合恭摺具
奏伏乞

皇太后

皇上聖鑒敕部核銷施行謹

奏

李文忠公奏稿卷十八